

ओं नमः परमात्मने, श्री महागणपतये नमः,
श्री गुरुभ्यो नमः, हरिः ओं

कृष्ण यजुर्वेदीय तैत्तिरीय संहिता पद पाठः
(वाक्य सहित)

सप्तमकाण्डे तृतीयः प्रश्नः

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in

Contents

7 कृष्ण यजुर्वेदीय तैत्तिरीय पद पाठे संहितायां
सप्तमं काण्डं 3

7.3सप्तमकाण्डे तृतीयः प्रश्नः – सत्रजातनिरूपणं..... 3

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं

7 कृष्ण यजुर्वेदीय तैत्तिरीय पद पाठे संहितायां सप्तमं

काण्डं

7.3 सप्तमकाण्डे तृतीयः प्रश्नः – सत्रजातनिरूपणं

TS 7.3.1.1

प्र॒ज॒वं वा॑ ए॒तेन॑ य॒न्ति॒ यद्-द॑श॒मम॑हः पा॒पाव॑ही॒यं वा॑ ए॒तेन॑ भ॒वन्ति॑
यद्-द॑श॒मम॑ह॒र्यो वै प्र॒ज॒वं य॑ता॒मप॑थेन प्र॒तिप॑द्यते यः स्था॒णुं ह॑न्ति
यो भ्रेषं॑ न्येति॒ स ही॑यते॒ स यो वै द॑श॒मेऽह॑न्न॒विवा॑क्य उप॒ह॒न्यते॒ स
ही॑यते॒ तस्मै॒ य उप॑ह॒ताय॒ व्याह॑ तमे॒वान्वा॒रभ्य॒ सम॑श्नुतेऽथ

यो व्याह स – [] 1

TS 7.3.1.1 - Padam

प्र॒ज॒वमि॑ति प्र – ज॒वम् । वै । ए॒तेन॑ । य॒न्ति॒ । यत् । द॑श॒मम् ।
अ॒हः । पा॒पाव॑ही॒यमि॑ति पाप – अ॒व॒ही॒यम् । वै । ए॒तेन॑ । भ॒वन्ति॑ ।

यत् । द॒श॒मम् । अ॒हः । यः । वै । प्र॒ज॒व॒मि॒ति॒ प्र – ज॒वम् । य॒ताम् ।
अ॒प॒थे॒न । प्र॒ति॒प॒द्य॒त इति॑ प्र॒ति – प॒द्य॒ते । यः । स्था॒णुम् । ह॒न्ति ।
यः । भ्रेष॑म् । न्ये॒तीति॑ नि – ए॒ति । सः । ही॒य॒ते । सः । यः । वै ।
द॒श॒मे । अ॒ह॒न् । अ॒वि॒वा॒क्य॑ इ॒त्य॒वि – वा॒क्ये । उ॒प॒ह॒न्य॒त
इ॒त्यु॒प॒ह॒न्य॒ते । सः । ही॒य॒ते । तस्मै॑ । यः । उ॒प॒ह॒ता॒ये॒त्यु॒प॒ह॒ताय॑ ।
व्या॒हेति॑ वि – आ॒ह । तम् । ए॒व । अ॒न्वा॒र॒भ्ये॒त्यनु॑ – आ॒र॒भ्य ।
स॒मि॒ति॒ । अ॒श्नु॒ते । अथ॑ । यः । व्या॒हेति॑ वि – आ॒ह । सः । 1 (50)

TS 7.3.1.2

ही॒य॒ते तस्मा॑द्-द॒श॒मे ऽह॑न्वि॒वा॒क्य॑ उ॒प॒ह॒ताय॑ न व्यु॒च्य॒मथो
ख॒ल्वाहु॑र्य॒ज्ञस्य॑ वै स॒मृ॒द्धे॒न दे॒वाः सु॒वर्गं॑ लो॒क॒मा॒यन् य॒ज्ञस्य॑
व्यृ॒द्धे॒नासु॑रान् प॒राऽभा॒व॒य॒न्निति॑ यत् ख॒लु वै य॒ज्ञस्य॑ स॒मृ॒द्धं तद्-
य॒ज॒मा॒नस्य॑ यद्व्यृ॒द्धं तद्भा॑तृ॒व्यस्य॑ स यो वै द॒श॒मेऽह॑न्वि॒वा॒क्य॑
उ॒प॒ह॒न्य॒ते स ए॒वाति॑ रेच॒यति॑ ते ये बा॒ह्या दृ॒शी॒क॒वः – [] 2

TS 7.3.1.2 - Padam

ही॒य॒ते॒ । तस्मा॑त् । द॒श॒मे॒ । अ॒ह॒न् । अ॒वि॒वा॒क्य॑ इ॒त्य॒वि॒ – वा॒क्ये॑ ।
उ॒प॒ह॒ता॒ये॒त्यु॒प॒ – ह॒ता॒य॒ । न॒ । व्यु॒च्य॒मि॒ति॒ वि॒-उ॒च्य॑म् । अ॒थो॒ इति॑ ।
ख॒लु॒ । आ॒हुः॒ । य॒ज्ञ॒स्य॑ । वै । स॒मृ॒द्धे॒ने॒ति॒ सं॒ – ऋ॒द्धे॒न॒ । दे॒वाः॒ ।
सु॒व॒र्ग॒मि॒ति॒ सु॒वः॒ – ग॒म् । लो॒क॒म् । आ॒य॒न् । य॒ज्ञ॒स्य॑ । व्यृ॒द्धे॒ने॒ति॒
वि॒ – ऋ॒द्धे॒न॒ । अ॒सु॒रा॒न् । प॒रे॒ति॒ । अ॒भा॒व॒य॒न् । इति॑ । यत् । ख॒लु॒ ।
वै । य॒ज्ञ॒स्य॑ । स॒मृ॒द्ध॒मि॒ति॒ सं॒ – ऋ॒द्ध॒म् । तत् । य॒ज॒मा॒न॒स्य॑ । यत् ।
व्यृ॒द्ध॒मि॒ति॒ वि॒-ऋ॒द्ध॒म् । तत् । भ्रा॒तृ॒व्य॒स्य॑ । सः । यः । वै । द॒श॒मे॒ ।
अ॒ह॒न् । अ॒वि॒वा॒क्य॑ इ॒त्य॒वि॒ – वा॒क्ये॑ । उ॒प॒ह॒न्य॒त॒ इत्यु॒प॒ – ह॒न्य॑ते॒ ।
सः । ए॒व । अ॒ती॒ति॒ । रे॒च॒य॒ति॒ । ते॒ । ये॒ । बा॒ह्याः॑ ।

दृ॒शी॒क॒वः॑ । 2 (50)

TS 7.3.1.3

स्यु॒स्ते॒ वि॒ ब्रू॒यु॒र्य॒दि॒ तत्र॑ न वि॒न्दे॒यु॒रन्त॑स्स॒द॒साद्-व्यु॒च्यं॑ य॒दि॒ तत्र॑ न
वि॒न्दे॒यु॒र्गृ॒ह॒प॒ति॒ना॒ व्यु॒च्यं॑ तद् व्यु॒च्य॑मे॒वाथ॑ वा ए॒तथ् सर्प॑रा॒ज्ञि॒या
ऋ॒ग्भिः॑ स्तु॒व॒न्ती॒यं॑ वै सर्प॑तो॒ रा॒ज्ञी॒ यद्वा॑ अ॒स्यां किं॑ चा॒र्च॑न्ति॒

यदानृ॑चुस्तेनेय॑ सर्परा॒ज्ञी ते यदे॒व किं च॑ वा॒चा

ऽऽनृ॑चुर्यदतो॑ऽद्ध्यर्चि॑तार – [] 3

TS 7.3.1.3 - Padam

स्युः । ते । वी॑ति । ब्रू॒युः । यदि॑ । तत्र॑ । न । वि॒न्देयुः॑ ।

अ॒न्तस्स॒दसा॒दित्य॑न्तः – स॒दसा॒त् । व्यु॒च्यमि॑ति वि – उ॒च्यम्॑ ।

यदि॑ । तत्र॑ । न । वि॒न्देयुः॑ । गृ॒हप॑तिनेति॑ गृ॒ह – प॒तिना॑ । व्यु॒च्यमि॑ति

वि – उ॒च्यम्॑ । तत् । व्यु॒च्यमि॑ति वि – उ॒च्यम्॑ । ए॒व । अथ॑ । वै ।

ए॒तत् । सर्प॑रा॒ज्ञिया॒ इति॑ सर्प – रा॒ज्ञियाः॑ । ऋ॒ग्भिरि॑त्यृक् – भिः ।

स्तु॒वन्ति॑ । इ॒यम् । वै । सर्प॑तः । रा॒ज्ञी । यत् । वै । अ॒स्याम् ।

किम् । च॒ । अ॒र्चन्ति॑ । यत् । आ॒नृ॒चुः । तेन॑ । इ॒यम् । सर्प॑रा॒ज्ञीति॑

सर्प॑-रा॒ज्ञी । ते । यत् । ए॒व । किम् । च॒ । वा॒चा । आ॒नृ॒चुः । यत् ।

अतो॑धि । अ॒र्चि॒तारः॑ । 3 (50)

TS 7.3.1.4

–स्तदु॑भयमाप्त्वा ऽवरु॑द्ध्योत् तिष्ठा॑मेति॒ ताभि॑र्मनसा॒ स्तुव॑ते न वा

इ॒माम॑श्चर॒थो ना॑श्चतरी॒रथः॑ स॒द्यः पर्या॑प्तुमर्हति॒ मनो॑ वा इ॒मां स॒द्यः

पर्याप्तुमर्हति॑ मनः॑ परि॑भवितुमथ॑ ब्रह्म॑ वदन्ति॑ परि॑मिता॒ वा ऋचः॑
परि॑मितानि॒ सामानि॑ परि॑मितानि॒ यजू॑ष्यथै॒तस्यै॒वान्तो॑
नास्ति॒ यद्-ब्रह्म॑ तत् प्रति॑गृणत॒ आ चक्षीत॑ स () प्रति॑गरः ॥ 4

TS 7.3.1.4 - Padam

तत् । उ॒भय॑म् । आ॒प्त्वा । अ॒वरु॑द्ध्येत्य॒व - रु॑द्ध्य । उ॒दि॒ति ।
ति॒ष्ठा॒म । इति॑ । ता॒भिः । मन॑सा । स्तु॒वते॑ । न । वै । इ॒माम् ।
अ॒श्वर॑थ इत्य॒श्व - र॒थः । न । अ॒श्वत॑रीरथ इत्य॒श्वत॑री - र॒थः ।
स॒द्यः । पर्या॑प्तुमि॒ति परि॑-आ॒प्तुम् । अ॒र्हति॑ । मनः॑ । वै । इ॒माम् ।
स॒द्यः । पर्या॑प्तुमि॒ति परि॑ - आ॒प्तुम् । अ॒र्हति॑ । मनः॑ ।
परि॑भवितुमि॒ति परि॑-भ॒वितु॑म् । अथ॑ । ब्रह्म॑ । वद॑न्ति । परि॑मिता॒ इति॑
परि॑-मिताः । वै । ऋचः॑ । परि॑मितानीति॒ परि॑ - मि॒तानि॑ । सामा॑नि ।
परि॑मितानीति॒ परि॑ - मि॒तानि॑ । यजू॑षि । अथ॑ । ए॒तस्य॑ । ए॒व ।
अ॒न्तः । न । अ॒स्ति । यत् । ब्रह्म॑ । तत् ।
प्रति॑गृणत॒ इति॑ प्रति॒ - गृ॒णते॑ । एति॑ । चक्षी॑त । सः () ।
प्रति॑गर इति॒ प्रति॒ - ग॒रः ॥ 4 (51)

(व्याह स – दृशीकवाँ – ऽर्चितारः – स – एकं च) (A1)

TS 7.3.2.1

ब्रह्मवादिनो॑ वदन्ति॑ किं॑ द्वाद॒शाह॑स्य॑ प्रथ॒मेना॑ह॒र्त्विजां॑ यज॒मानो॑
वृ॒द्ध इति॑ तेज॑ इन्द्रि॒यमि॑ति॒ किं द्वि॒तीये॑नेति॑ प्रा॒णान॒न्नाद्य॑मि॒ति किं॑
तृ॒तीये॑नेति॑ त्री॒निमा॑न् लो॒कानि॑ति॒ किं चतु॑र्थेनेति॑ चतु॒ष्पदः॑ प॒शूनि॑ति॒
किं पञ्च॑मेनेति॑ पञ्चाक्ष॒रां प॒ङ्क्तिमि॑ति॒ किं ष॒ष्ठेने॑ति॒ षड् ऋ॒तूनि॑ति॒
किं सप्त॑मेनेति॑ सप्त॒पदां॑ शक्व॒रीमि॑ति॒ – [] 5

TS 7.3.2.1 - Padam

ब्रह्मवादि॑न इति॑ ब्रह्म – वादि॑नः । वद॑न्ति । किम् । द्वाद॒शाह॑स्येति॑
द्वाद॒श – अ॒हस्य॑ । प्रथ॒मेन॑ । अ॒ह्ना । ऋ॒त्विजा॑म् । यज॒मानः॑ । वृ॒द्धे ।
इति॑ । तेजः॑ । इन्द्रि॒यम् । इति॑ । किम् । द्वि॒तीये॑न । इति॑ । प्रा॒णानि॑ति॒
प्र – अ॒नान् । अ॒न्नाद्य॑मित्य॒न्न – अद्य॑म् । इति॑ । किम् । तृ॒तीये॑न ।
इति॑ । त्री॒न् । इ॒मान् । लो॒कान् । इति॑ । किम् । चतु॑र्थेन॑ । इति॑ ।
चतु॒ष्पद॑ इति॑ चतुः-प॒दः । प॒शून् । इति॑ । किम् । पञ्च॑मेन॑ । इति॑ ।
पञ्चाक्ष॒रामि॑ति॒ पञ्च – अ॒क्षरा॑म् । प॒ङ्क्तिम् । इति॑ । किम् । ष॒ष्ठेन॑ ।

इति॑ । षट्॑ । ऋ॒तून् । इति॑ । किम् । स॒प्त॒मे॒न॑ । इति॑ ।

स॒प्त॒प॒दामि॑ति स॒प्त – प॒दाम् । शक्व॑रीम् । इति॑ । 5 (50)

TS 7.3.2.2

कि॒म॒ष्ट॒मे॒ने॒त्य॒ष्टाक्ष॑रां गाय॒त्रीमि॑ति किं न॒व॒मे॒ने॒ति॑ त्रि॒वृ॒त॒ꣳ स्तो॒ममि॑ति
किं द॒श॒मे॒ने॒ति॑ द॒शाक्ष॑रां वि॒राज॑मिति कि॒मे॒काद॑शेनेत्ये॒काद॑शाक्ष॒रां
त्रि॒ष्टु॒भमि॑ति किं द्वा॒द॒शे॒ने॒ति॑ द्वा॒द॒शाक्ष॑रां जग॑तीमित्ये॒ताव॑द्वा अ॒स्ति
याव॑दे॒तद् – याव॑दे॒वास्ति॑ त॒देषां॑ वृ॒द्धे ॥ 6

TS 7.3.2.2 - Padam

किम् । अ॒ष्ट॒मे॒न॑ । इति॑ । अ॒ष्टाक्ष॑रामि॒त्य॒ष्टा – अ॒क्ष॒राम् । गाय॑त्रीम् ।
इति॑ । किम् । न॒व॒मे॒न॑ । इति॑ । त्रि॒वृ॒त॒मि॑ति त्रि – वृ॒त॒म् । स्तो॒म॒म् ।
इति॑ । किम् । द॒श॒मे॒न॑ । इति॑ । द॒शाक्ष॑रामि॒ति द॒श – अ॒क्ष॒राम् ।
वि॒राज॑मिति वि – रा॒ज॒म् । इति॑ । किम् । ए॒काद॑शेन॑ । इति॑ ।
ए॒काद॑शाक्ष॒रामि॒त्ये॒काद॑श – अ॒क्ष॒राम् । त्रि॒ष्टु॒भ॒म् । इति॑ । किम् ।
द्वा॒द॒शे॒न॑ । इति॑ । द्वा॒द॒शाक्ष॑रामि॒ति द्वा॒द॒श – अ॒क्ष॒राम् । जग॑तीम् ।
इति॑ । ए॒ताव॑त् । वै । अ॒स्ति॒ । याव॑त् । ए॒तत् । याव॑त् । ए॒व ।

अ॒स्ति॑ । तत् । ए॒षाम् । वृ॒द्धे ॥ 6 (41)

(श॒क्व॒री॒मित्ये॑ – क॒च॒त्वा॒रि॒श्च॑) (A2)

TS 7.3.3.1

ए॒ष वा आ॒प्तो द्वा॒द॒शा॒हो यत् त्रयो॑द॒श॒रा॒त्रः स॒मा॒न॑ ह्ये॒तद॒ह॒र्यत्
प्रा॒य॒णी॒यश्चो॒द॒य॒नी॒यश्च॑ त्र्य॒ति॒रा॒त्रो भ॒व॒ति त्रय॑ इ॒मे लो॒का ए॒षां
लो॒का॒ना॒मा॒प्त्यै॑ प्रा॒णो वै प्र॒थ॒मोऽति॒रा॒त्रो व्या॒नो द्वि॒तीयो॑ ऽपान॒स्तृ॒तीयः॑
प्रा॒णा॒पा॒नो-दा॒ने॒ष्वे॒वा॒न्नाद्ये॑ प्र॒ति ति॒ष्ठन्ति॑ स॒र्व॒मा॒यु॒र्यन्ति॑ य ए॒वं
वि॒द्वा॒ँस-स्त्रयो॑द॒श॒रा॒त्र-मा॒स॒ते तदा॑हु॒र्वा॒ग्वा ए॒षा वि॒त॒ता – [] 7

TS 7.3.3.1 - Padam

ए॒षः । वै । आ॒प्तः । द्वा॒द॒शा॒ह इति॑ द्वा॒द॒श – अ॒हः । यत् ।
त्रयो॑द॒श॒रा॒त्र इति॑ त्रयो॑द॒श – रा॒त्रः । स॒मा॒नम् । हि । ए॒तत् ।
अ॒हः । यत् । प्रा॒य॒णी॒य इति॑ प्र – अ॒य॒नी॒यः । च । उ॒द॒य॒नी॒य
इत्यु॑त् – अ॒य॒नी॒यः । च । त्र्य॒ति॒रा॒त्र इति॑ त्रि – अ॒ति॒रा॒त्रः ।
भ॒व॒ति । त्रयः॑ । इ॒मे । लो॒काः । ए॒षाम् । लो॒का॒ना॒म् । आ॒प्त्यै॑ ।
प्रा॒ण इति॑ प्र – अ॒नः । वै । प्र॒थ॒मः । अ॒ति॒रा॒त्र इत्य॑ति – रा॒त्रः ।

व्या॒न इति॑ वि – अ॒नः । द्वि॒तीयः । अ॒पा॒न इत्य॑प-अ॒नः । तृ॒तीयः ।
प्रा॒णा॒पा॒नो॒दाने॑ष्विति प्रा॒णा॒पा॒न – उ॒दा॒नेषु॑ । ए॒व । अ॒न्नाद्य॑
इत्य॑न्न – अद्ये॑ । प्र॒तीति॑ । ति॒ष्ठन्ति॑ । स॒र्वम् । आ॒युः । य॒न्ति । ये ।
ए॒वम् । वि॒द्वा॒ऽसः॑ । त्रयो॒दश॒रात्र॑मिति त्रयो॒दश – रा॒त्रम् । आ॒स॒ते ।
तत् । आ॒हुः । वाक् । वै । ए॒षा । वि॒त॒तेति॑ वि – त॒ता । 7 (50)

TS 7.3.3.2

यद् द्वा॒द॒शा॒ह॒स्तां वि॒च्छि॒न्द्य॑र्यन्म॒ध्ये ऽति॑रा॒त्रं कुर्यु॑रु॒प॒दा॒सु॒का
गृ॒ह॒प॒ते॒र्वा॒ख् स्या॑-दु॒परि॑ष्टाच्छ॒न्दो॒मानां॑ म॒हा॒व्र॒तं कु॑र्वन्ति स॒न्त॒तामे॒व
वा॒च॒म॒व रु॒न्ध॒तेऽनु॑प॒दा॒सु॒का गृ॒ह॒प॒ते॒र्वाग्-भ॑वति प॒श॒वो वै छि॑न्दो॒मा
अ॒न्नं म॒हा॒व्र॒तं यदु॑परि॑ष्टाच्छ॒न्दो॒मानां॑ म॒हा॒व्र॒तं कु॑र्वन्ति प॒शुषु॑ चै॒वान्नाद्ये॑
च प्र॒ति ति॒ष्ठन्ति॑ ॥ 8

TS 7.3.3.2 - Padam

यत् । द्वा॒द॒शा॒ह इति॑ द्वा॒द॒श – अ॒हः । ताम् । वी॒ति । छि॒न्द्युः । यत् ।
म॒ध्ये । अ॒ति॒रा॒त्र॒मित्य॑ति-रा॒त्रम् । कुर्युः । उ॒प॒दा॒सु॒केत्यु॑प-दा॒सु॒का ।
गृ॒ह॒प॒ते॒रिति॑ गृ॒ह – प॒तेः । वाक् । स्या॒त् । उ॒परि॑ष्टात् ।

छन्दो॑मानामि॒ति छन्दः॑ – माना॑म् । महा॒व्रतमि॒ति महा – व्रत॑म् ।
 कुर्व॑न्ति । संत॑तामि॒ति सं-तता॑म् । ए॒व । वाच॑म् । अवे॑ति । रु॒न्ध॒ते ।
 अनु॑पदासु॒केत्यनु॑प – दासु॑का । गृह॑पतेरि॒ति गृह – पतेः॑ । वाक् ।
 भव॑ति । प॒शवः॑ । वै । छन्दो॑मा इति॑ छन्दः – माः । अन्न॑म् ।
 महा॒व्रतमि॒ति महा – व्रत॑म् । यत् । उप॑रिष्ठात् । छन्दो॑मानामि॒ति
 छन्दः॑ – माना॑म् । महा॒व्रतमि॒ति महा – व्रत॑म् । कुर्व॑न्ति । प॒शुषु॑ ।
 च । ए॒व । अन्ना॑द्य इत्य॑न्न – अद्यै॑ । च । प्र॒तीति॑ । तिष्ठ॑न्ति ॥ 8 (43)

(वि॒त॒ता – त्रि॒च॒त्वारि॑ञ्च) (A3)

TS 7.3.4.1

आ॒दि॒त्या अ॒काम॑यन्तो-भयो॑र्लो॒कयोर् ऋ॒द्ध॒न्नुया॑मेति॒ त ए॒तं
 चतु॑र्दश॒रात्र- म॑पश्यन् तमा॑ऽहरन् तेना॑यजन्त॒ ततो॑ वै त उ॒भयो॑-
 लो॒कयो॑-रा॒द्ध॒र्नुव॑न्नस्मिञ्श्चा-मु॒ष्मिञ्श्च॑ य ए॒वं वि॒द्वाञ्स-
 श्वतु॑र्दश॒रात्रमा॑सत उ॒भयो॑रेव लो॒कयोर्. ऋ॒द्ध॒न्नुव॑न्त्यस्मिञ्श्चा-मु॒ष्मिञ्श्च॑
 चतु॑र्दश॒रात्रो भ॑वति स॒प्त ग्रा॒म्या ओष॑धयः स॒प्ताऽऽ*र॑ण्या
 उ॒भयी॑षाम॒वरु॑द्ध्यै यत् प॒राची॑नानि पृ॒ष्ठानि॑ – [] 9

TS 7.3.4.1 - Padam

आ॒दि॒त्याः । अ॒का॒म॒य॒न्त॒ । उ॒भ॒योः॑ । लो॒क॒योः॑ । ऋ॒द्॒ध॒नु॒या॒म॒ । इति॑ ।
ते । ए॒त॒म् । च॒तु॒र्द॒श॒रा॒त्र॒मि॒ति॑ च॒तु॒र्द॒श॒ – रा॒त्र॒म् । अ॒प॒श्य॒न् । त॒म् ।
ए॒ति॑ । अ॒ह॒र॒न् । ते॒न॑ । अ॒य॒ज॒न्त॒ । त॒तः॑ । वै । ते । उ॒भ॒योः॑ ।
लो॒क॒योः॑ । आ॒द्॒ध॒नु॒व॒न् । अ॒स्मि॒न् । च॒ । अ॒मु॒ष्मि॒न् । च॒ । ये ।
ए॒व॒म् । वि॒द्वा॒ꣳसः॑ । च॒तु॒र्द॒श॒रा॒त्र॒मि॒ति॑ च॒तु॒र्द॒श॒ – रा॒त्र॒म् । आ॒स॒ते॑ ।
उ॒भ॒योः॑ । ए॒व । लो॒क॒योः॑ । ऋ॒द्॒ध॒नु॒व॒न्ति॑ । अ॒स्मि॒न् । च॒ ।
अ॒मु॒ष्मि॒न् । च॒ । च॒तु॒र्द॒श॒रा॒त्र॒ इति॑ च॒तु॒र्द॒श॒ – रा॒त्रः॑ । भ॒व॒ति॑ ।
स॒प्त॒ । ग्रा॒म्याः॑ । ओ॒ष॒ध॒यः॑ । स॒प्त॒ । आ॒र॒ण्याः॑ । उ॒भ॒यी॑षाम् ।
अ॒व॒रु॒द्॒ध्या॒ इत्य॑व॒-रु॒द्॒ध्यै॑ । यत् । प॒रा॒ची॒ना॒नि॑ । पृ॒ष्ठा॒नि॑ । 9 (50)

TS 7.3.4.2

भ॒व॒न्त्य॒मु॒मे॒व॒ तै॒र्लो॒क॒म॒भि॒ ज॒य॒न्ति॑ यत् प्र॒ती॒ची॒ना॒नि॑ पृ॒ष्ठा॒नि॑
भ॒व॒न्ती॒म॒मे॒व॒ तै॒र्लो॒क॒म॒भि॒ ज॒य॒न्ति॑ त्र॒य॒स्त्रि॒ꣳशौ॑ म॒द्ध्य॒तः॑ स्तो॒मौ॑
भ॒व॒तः॑ सा॒म्रा॒ज्य॒मे॒व॒ ग॒च्छ॒न्त्य॒धि॒रा॒जौ॑ भ॒व॒तो॒ऽधि॒रा॒जा॑ ए॒व॒ स॒मा॒ना॒नां॑
भ॒व॒न्त्य॒ति॒रा॒त्रा॒व॒भि॒तो॑ भ॒व॒तः॑ प॒रि॒गृ॒ही॒त्यै॑ ॥ 10

TS 7.3.4.2 - Padam

भवन्ति॑ । अ॒मुम् । ए॒व । तैः॑ । लो॒कम् । अ॒भीति॑ । ज॒यन्ति॑ । यत् ।
प्र॒ती॒ची॒ना॒नि । पृ॒ष्ठानि॑ । भवन्ति॑ । इ॒मम् । ए॒व । तैः॑ । लो॒कम् ।
अ॒भीति॑ । ज॒यन्ति॑ । त्रय॑स्त्रि॒ंश॒विति॑ त्रयः – त्रि॒ंशौ । म॒द्ध्यतः॑ ।
स्तोमौ॑ । भवतः॑ । सा॒म्राज्य॑मिति॒ सां – रा॒ज्यम् । ए॒व । ग॒च्छन्ति॑ ।
अ॒धि॒रा॒जा॒वित्य॑धि – रा॒जौ । भवतः॑ । अ॒धि॒रा॒जा इत्य॑धि – रा॒जाः ।
ए॒व । स॒मा॒ना॒ना॒म् । भवन्ति॑ । अ॒ति॒रा॒त्रा॒वित्य॑ति – रा॒त्रौ । अ॒भितः॑ ।
भवतः॑ । परि॑गृहीत्या इति॒ परि॑ – गृ॒हीत्यै॑ ॥ 10 (34)

(पृ॒ष्ठानि॑ – च॒तु॒स्त्रि॒ंश॒च्च) (A4)

TS 7.3.5.1

प्र॒जा॒प॒तिः सु॒वर्गं॑ लो॒कमै॑त् तं दे॒वा अ॒न्वा॒यन् ता॒नादि॒त्याश्च॑
प॒श॒वश्चा॒न्वा॒यन् ते दे॒वा अ॒ब्रु॒वन् यान् प॒शून्पा॒जी॒विष्म॑ त इ॒मै
ऽन्वा॒गम॒न्निति॑ तेभ्य॑ ए॒तं च॑तु॒र्द॒श॒रा॒त्रं प्र॒त्यौ॒हन् त आ॑दि॒त्याः पृ॒ष्ठैः
सु॒वर्गं॑ लो॒कमा॒रो॒हन् त्र्य॒हा॒भ्याम॒स्मिन् लो॒के प॒शून् प्र॒त्यौ॒हन्
पृ॒ष्ठैरा॑दि॒त्या अ॒मुष्मिन्॑ लो॒क आ॒र्ध॒र्नु॒वन् त्र्य॒हा॒भ्याम॒स्मिन् – [] 11

TS 7.3.5.1 - Padam

प्र॒जाप॑तिरि॒ति प्र॒जा – प॒तिः । सु॒वर्ग॑मि॒ति सु॒वः – ग॒म् । लो॒कम् ।
ऐ॒त् । त॒म् । दे॒वाः । अ॒न्वि॒ति । आ॒य॒न् । तान् । आ॒दि॒त्याः । च ।
प॒शवः॑ । च । अ॒न्वि॒ति । आ॒य॒न् । ते । दे॒वाः । अ॒ब्रु॒वन् । यान् ।
प॒शून् । उ॒पाजी॑वि॒ष्मेत्यु॑प – अ॒जीवि॑ष्म । ते । इ॒मे ।
अ॒न्वाग्म॑न्नित्यनु॒-आ॒ग॒म॒न् । इति॑ । तेभ्यः॑ । ए॒त॒म् । च॒तु॒र्द॒श॒रा॒त्रमि॑ति
च॒तु॒र्द॒श॒-रा॒त्रम् । प्र॒तीति॑ । औ॒ह॒न् । ते । आ॒दि॒त्याः । पृ॒ष्ठैः ।
सु॒वर्ग॑मि॒ति सु॒वः – ग॒म् । लो॒कम् । ए॒ति । अ॒रो॒ह॒न् ।
त्र्य॒हाभ्या॑मि॒ति त्रि – अ॒हाभ्या॑म् । अ॒स्मिन् । लो॒के । प॒शून् ।
प्र॒तीति॑ । औ॒ह॒न् । पृ॒ष्ठैः । आ॒दि॒त्याः । अ॒मुष्मि॑न् । लो॒के ।
आ॒र्ध्नु॑वन् । त्र्य॒हाभ्या॑मि॒ति त्रि – अ॒हाभ्या॑म् । अ॒स्मिन् । 11 (50)

TS 7.3.5.2

लो॒के प॒शवो॑ य ए॒वं वि॒द्वाँस्-श्च॑तु॒र्द॒श॒रा॒त्रमा॑स॒त उ॒भयो॑रे॒व
लो॒कयो॑र् ऋ॒ध्नु॑वन्त्यस्मि॒ञ्श्चा॒मुष्मि॑ञ्श्च पृ॒ष्ठैरे॒वाऽमु॑ष्मिन्
लो॒क ऋ॒ध्नु॑वन्ति त्र्य॒हाभ्या॑म॒स्मिन् लो॒के ज्यो॒तिर्गो॑रा॒युरि॑ति त्र्य॒हो

भवती॑यं वा॒व ज्योति॑रन्तरि॒क्षं गौ॒रसा॑वायु॒रिमा॑ने॒व लो॒कान॒भ्यारो॑हन्ति
यद॒न्यतः॑ पृ॒ष्ठानि॒ स्युर्वि॑विवधः॑ स्यान्म॒द्ध्ये पृ॒ष्ठानि॑ भवन्ति

सविवध॒त्वायौ – [] 12

TS 7.3.5.2 - Padam

लो॒के । प॒शवः॑ । ये । ए॒वम् । वि॒द्वाँ॑सः । च॒तु॒र्द॒श॒रा॒त्रमि॑ति
चतु॒र्द॒श – रा॒त्रम् । आ॒स॒ते । उ॒भयोः॑ । ए॒व । लो॒कयोः॑ । ऋ॒द्ध॒नु॒वन्ति॑ ।
अ॒स्मिन् । च । अ॒मुष्मिन् । च । पृ॒ष्ठैः । ए॒व । अ॒मुष्मिन् । लो॒के ।
ऋ॒द्ध॒नु॒वन्ति॑ । त्र्य॒हा॒भ्यामि॑ति त्रि – अ॒हा॒भ्याम् । अ॒स्मिन् । लो॒के ।
ज्योतिः॑ । गौः । आ॒युः । इति॑ । त्र्य॒ह इति॑ त्रि-अ॒हः । भ॒व॒ति । इ॒यम् ।
वा॒व । ज्योतिः॑ । अ॒न्तरि॑क्षम् । गौः । अ॒सौ । आ॒युः । इ॒मान् । ए॒व ।
लो॒कान् । अ॒भ्यारो॑हन्तीत्य॒भि – आ॒रो॒हन्ति॑ । यत् । अ॒न्यतः॑ । पृ॒ष्ठानि॑ ।
स्युः । वि॒विव॑धमि॒ति वि-वि॒व॒धम् । स्यात् । म॒द्ध्ये॑ । पृ॒ष्ठानि॑ ।
भव॒न्ति । स॒वि॒व॒ध॒त्वाये॑ति स॒वि॒व॒ध – त्वा॒य । 12 (50)

TS 7.3.5.3

–जो वै वीर्यं पृष्ठान्योज एव वीर्यं मद्ध्यतो दधते बृहद्–रथन्तराभ्यां॥
यन्तीयं वाव रथन्तरमसौ बृहदाभ्यामेव यन्त्यथो अनयोरेव प्रति
तिष्ठन्त्येते वै यज्ञस्याञ्जसायनी स्रुती ताभ्यामेव सुवर्गं लोकं यन्ति
पराञ्चो वा एते सुवर्गं लोकमभ्यारोहन्ति ये पराचीनानि
पृष्ठान्युपयन्ति प्रत्यङ् त्र्यहो भवति प्रत्यवरूढ्या अथो प्रतिष्ठित्या ()
उभयोर्लोकयोर् ऋद्ध्वोत् तिष्ठन्ति चतुर्दशैतास्तासां या दश
दशाक्षरा विराडन्नं विराड् विराजैवान्नाद्यमव रुन्धते याश्चतस्रश्चतस्रो
दिशो दिक्ष्वेव प्रति तिष्ठन्त्यतिरात्रावभितो भवतः परिगृहीत्यै ॥ 13

TS 7.3.5.3 - Padam

ओजः । वै । वीर्यम् । पृष्ठानि । ओजः । एव । वीर्यम् । मद्ध्यतः ।
दधते । बृहद्–रथन्तराभ्यामिति बृहत् – रथन्तराभ्याम् । यन्ति । इयम् ।
वाव । रथन्तरमिति रथं – तरम् । असौ । बृहत् । आभ्याम् । एव ।
यन्ति । अथो इति । अनयोः । एव । प्रतीति । तिष्ठन्ति । एते इति ।
वै । यज्ञस्य । अञ्जसायनी इत्यञ्जसा – अयनी । स्रुती इति ।

ताभ्याम् । ए॒व । सु॒व॒र्गमि॑ति सु॒वः – ग॒म् । लो॒कम् । य॒न्ति ।
परा॑ञ्चः । वै । ए॒ते । सु॒व॒र्गमि॑ति सु॒वः – ग॒म् । लो॒कम् ।
अ॒भ्या॒रो॒हन्ती॑त्य॒भि – आ॒रो॒हन्ति॑ । ये । प॒रा॒ची॒ना॒नि । पृ॒ष्ठानि॑ ।
उ॒प॒य॒न्ती॑त्यु॒प – य॒न्ति । प्र॒त्यङ् । त्र्य॒ह इति॑ त्रि – अ॒हः । भ॒व॒ति ।
प्र॒त्य॒व॒रू॒ढ्या इति॑ प्र॒ति – अ॒व॒रू॒ढ्यै । अथो॑ इति॑ । प्र॒ति॒ष्ठि॒त्या इति॑
प्र॒ति–स्थि॑त्यै () । उ॒भयोः॑ । लो॒कयोः॑ । ऋ॒द्ध्वा । उ॒दि॒ति । ति॒ष्ठन्ति॑ ।
चतु॑र्द॒शेति॑ चतुः – द॒श । ए॒ताः । ता॒साम् । याः । द॒श । द॒शाक्ष॑रेति॑
द॒श – अ॒क्ष॒रा । वि॒रा॒डिति॑ वि – राट् । अ॒न्नम् । वि॒रा॒डिति॑
वि – राट् । वि॒रा॒जेति॑ वि – रा॒जा । ए॒व । अ॒न्ना॒द्य॒मि॒त्य॒न्न – अ॒द्यम् ।
अ॒वेति॑ । रु॒न्ध॒ते । याः । च॒त॒स्रः । च॒त॒स्रः । दि॒शः । दि॒क्षु । ए॒व ।
प्र॒तीति॑ । ति॒ष्ठन्ति॑ । अ॒ति॒रा॒त्रा॒वि॒त्य॒ति – रा॒त्रौ । अ॒भि॒तः । भ॒व॒तः ।
प॒रि॒गृ॒ही॒त्या इति॑ प॒रि – गृ॒ही॒त्यै ॥ 13 (81)

(आ॒ध॒र्नु॒वन् त्र्य॑हाभ्या॒मस्मि॑न् – स॒वि॒व॒ध॒त्वा॒य – प्र॒ति॒ष्ठ॒त्या –
ए॒क॒त्रिं॒श॒च्च) (A5)

TS 7.3.6.1

इन्द्रो॑ वै स॒दृङ् दे॒वता॑भि॒रासी॒त् स न॑ व्या॒वृत॑मगच्छ॒त् स
प्र॒जाप॑तिमुपा॒धाव॑त् तस्मा॑ ए॒तं पञ्च॑दशरा॒त्रं प्रा॑यच्छ॒त् तमा॑ऽह॒रत्
तेना॑यजत॒ ततो॑ वै सोऽन्या॑भि॒र्दे॒वता॑भि॒र्व्या॒वृत॑मगच्छ॒द्य ए॒वं
वि॒द्वाꣳसः॑ पञ्चदशरा॒त्रमा॑सते व्या॒वृत॑मे॒व पा॒प्मना॑ भ्रातृ॒व्येण॑ गच्छन्ति॒
ज्योति॑र्गौरा॒युरि॑ति त्र्य॒हो भ॑वती॒यं वा॑व ज्योति॑रन्तरि॒क्षं – [] 14

TS 7.3.6.1 - Padam

इन्द्रः॑ । वै । स॒दृङ्ङि॑ति स – दृङ् । दे॒वता॑भिः । आ॒सीत् । सः । न ।
व्या॒वृत॑मिति वि – आ॒वृत॑म् । अ॒गच्छ॑त् । सः । प्र॒जाप॑तिमिति
प्र॒जा – प॒तिम् । उपे॑ति । अ॒धाव॑त् । तस्मै॑ । ए॒तम् ।
पञ्च॑दशरा॒त्रमिति॑ पञ्चदश–रा॒त्रम् । प्रे॑ति । अ॒यच्छ॑त् । तम् । ए॒ति ।
अ॒ह॒रत् । तेन॑ । अ॒यज॑त । ततः॑ । वै । सः । अ॒न्याभिः॑ । दे॒वता॑भिः ।
व्या॒वृत॑मिति वि – आ॒वृत॑म् । अ॒गच्छ॑त् । ये । ए॒वम् । वि॒द्वाꣳसः॑ ।
पञ्च॑दशरा॒त्रमिति॑ पञ्चदश – रा॒त्रम् । आ॑सते । व्या॒वृत॑मिति
वि – आ॒वृत॑म् । ए॒व । पा॒प्मना॑ । भ्रातृ॒व्येण॑ । ग॒च्छन्ति॑ । ज्योतिः॑ ।

गौः । आयुः । इति । त्र्यह इति त्रि – अहः । भवति । इयम् ।

वाव । ज्योतिः । अन्तरिक्षम् । 14 (50)

TS 7.3.6.2

गौरसावायुरेष्वेव लोकेषु प्रति तिष्ठन्त्यसत्रं वा एतद्-यदच्छन्दोमं
यच्छन्दोमा भवन्ति तेन सत्रं देवता एव पृष्ठैरव रुन्धते
पशूञ्छन्दोमैरोजो वै वीर्यं पृष्ठानि पशवः छन्दोमा ओजस्येव वीर्यं
पशुषु प्रति तिष्ठन्ति पञ्चदशरात्रो भवति पञ्चदशो वज्रो वज्रमेव
भ्रातृव्येभ्यः प्र हरन्त्यतिरात्रावभितो भवत इन्द्रियस्य ()

परिगृहीत्यै ॥ 15

TS 7.3.6.2 - Padam

गौः । असौ । आयुः । एषु । एव । लोकेषु । प्रतीति । तिष्ठन्ति ।
असत्रम् । वै । एतत् । यत् । अछन्दोममित्यछन्दः – मम् । यत् ।
छन्दोमा इति छन्दः – माः । भवन्ति । तेन । सत्रम् । देवताः । एव ।
पृष्ठैः । अवेति । रुन्धते । पशून् । छन्दोमैरिति छन्दः-मैः । ओजः ।
वै । वीर्यम् । पृष्ठानि । पशवः । छन्दोमा इति छन्दः – माः ।

ओज॑सि । ए॒व । वी॒र्ये॑ । प॒शुषु॑ । प्र॒तीति॑ । ति॒ष्ठन्ति॑ । प॒ञ्चद॑शरा॒त्र
इति॑ पञ्चद॑श – रा॒त्रः । भ॒वति॑ । प॒ञ्चद॑श इति॑ पञ्च – द॒शः ।
व॒ज्रः । व॒ज्रम् । ए॒व । भ्रा॑तृ॒व्येभ्यः॑ । प्रेति॑ । ह॒रन्ति॑ ।
अ॒तिरा॑त्रा॒वित्य॑ति – रा॒त्रौ । अ॒भितः॑ । भ॒वतः॑ । इ॒न्द्रि॒यस्य॑ () ।
परि॑गृही॒त्या इति॑ परि – गृ॒हीत्यै॑ ॥ 15 (51)

(अ॒न्तरि॑क्ष-मि॒न्द्रि॒यस्यै॑-कञ्च) (A6)

TS 7.3.7.1

इन्द्रो॑ वै शिथि॒ल इ॒वाऽप्र॑ति॒ष्ठित॑ आसी॒थ् सोऽसु॑रेभ्योऽबि॒भेथ् स
प्र॒जाप॑तिमुपा॒धाव॑त् तस्मा॑ ए॒तं प॒ञ्चद॑शरा॒त्रं व॒ज्रं प्रा॑यच्छत्
तेना॑सुरान् परा॒भाव्य॑ वि॒जित्य॑ श्रिय॑मगच्छदग्नि॒ष्टुता॑ पा॒प्मानं॑ निरद॒हत
प॒ञ्चद॑शरा॒त्रेणौ॒जो ब॑लमिन्द्रि॒यं वी॒र्यमा॑त्मन्नधत्त॒ य ए॒वं वि॒द्वाँसः॑
प॒ञ्चद॑शरा॒त्रमा॑सते भ्रा॑तृ॒व्याने॒व परा॑भाव्य वि॒जित्य॑ श्रियं
गच्छ॑न्त्यग्नि॒ष्टुता॑ पा॒प्मानं॑ नि – [] 16

TS 7.3.7.1 - Padam

इन्द्रः । वै । शिथिलः । इव । अप्रतिष्ठित इत्यप्रति – स्थितः ।
आसीत् । सः । असुरेभ्यः । अबिभेत् । सः ।
प्रजापतिमिति प्रजा – पतिम् । उपेति । अधावत् । तस्मै । एतम् ।
पञ्चदशरात्रमिति पञ्चदश – रात्रम् । वज्रम् । प्रेति । अयच्छत् ।
तेन । असुरान् । पराभाव्येति परा – भाव्य । विजित्येति वि-जित्य ।
श्रियम् । अगच्छत् । अग्निष्टुतेत्यग्नि – स्तुता । पाप्मानम् । निरिति ।
अदहत । पञ्चदशरात्रेणेति पञ्चदश – रात्रेण । ओजः । बलम् ।
इन्द्रियम् । वीर्यम् । आत्मन् । अधत्त । ये । एवम् । विद्वांसः ।
पञ्चदशरात्रमिति पञ्चदश – रात्रम् । आसते । भ्रातृव्यान् । एव ।
पराभाव्येति परा – भाव्य । विजित्येति वि – जित्य । श्रियम् ।
गच्छन्ति । अग्निष्टुतेत्यग्नि – स्तुता । पाप्मानम् । निरिति । 16 (50)

TS 7.3.7.2

दहन्ते पञ्चदशरात्रेणौजो बलमिन्द्रियं वीर्यमात्मन् दधत एता एव
पशव्याः पञ्चदश वा अर्द्धमासस्य रात्रयोऽर्द्धमासशः सँवत्सर

आ॒प्य॒ते सँ॒व॒थ्स॒रं प॒श॒वोऽनु॒ प्र जा॒य॒न्ते तस्मा॑त् प॒श॒व्या ए॒ता ए॒व
सु॒व॒र्ग्याः पञ्च॑द॒श वा अ॒र्ध॒मा॒सस्य॑ रा॒त्रयोऽर्ध॑मा॒स॒शः सँ॒व॒थ्स॒र
आ॒प्य॒ते सँ॒व॒थ्स॒रः सु॒व॒र्गो लो॒कस्तस्मा॑त् सु॒व॒र्ग्या ज्योति॑र्गो॒रायु॑रिति
न्य॒हो भ॒वती॑यं वा॒व ज्योति॑रन्तरि॒क्षं – [] 17

TS 7.3.7.2 - Padam

द॒ह॒न्ते । पञ्च॑द॒शरा॒त्रेणे॑ति पञ्च॑द॒श – रा॒त्रेण॑ । ओ॒जः । ब॒लम् ।
इ॒न्द्रि॒यम् । वी॒र्य॑म् । आ॒त्मन् । द॒ध॒ते । ए॒ताः । ए॒व । प॒श॒व्याः ।
पञ्च॑द॒शेति॑ पञ्च॑ – द॒श । वै । अ॒र्ध॒मा॒सस्ये॑त्य॒र्ध – मा॒सस्य॑ ।
रा॒त्रयः॑ । अ॒र्ध॒मा॒स॒श इत्य॑र्ध॒मा॒स – शः॑ ।
सँ॒व॒थ्स॒र इति॑ सं॒-व॒थ्स॒रः । आ॒प्य॒ते । सँ॒व॒थ्स॒रमि॑ति सं॒-व॒थ्स॒रम् ।
प॒श॒वः । अ॒नु । प्रे॑ति । जा॒य॒न्ते । तस्मा॑त् । प॒श॒व्याः । ए॒ताः । ए॒व ।
सु॒व॒र्ग्या इति॑ सु॒वः – र्ग्याः । पञ्च॑द॒शेति॑ पञ्च॑ – द॒श । वै ।
अ॒र्ध॒मा॒सस्ये॑त्य॒र्ध – मा॒सस्य॑ । रा॒त्रयः॑ ।
अ॒र्ध॒मा॒स॒श इत्य॑र्ध॒मा॒स – शः॑ । सँ॒व॒थ्स॒र इति॑ सं – व॒थ्स॒रः ।
आ॒प्य॒ते । सँ॒व॒थ्स॒र इति॑ सं – व॒थ्स॒रः । सु॒व॒र्ग इति॑ सु॒वः – गः॑ ।

लोकः । तस्मात् । सुवर्गा इति सुवः – ग्याः ।

ज्योतिः । गौः । आयुः । इति । त्र्यह इति त्रि – अहः । भवति ।

इयम् । वाव । ज्योतिः । अन्तरिक्षम् । 17 (50)

TS 7.3.7.3

गौरसावायुरिमानेव लोकानभ्यारोहन्ति यदन्यतः पृष्ठानि स्युर्विविधः
स्यान्मद्ध्ये पृष्ठानि भवन्ति सविवधत्वायौजो वै वीर्यं पृष्ठान्योज एव
वीर्यं मद्ध्यतो दधते बृहद्-रथन्तराभ्यां यन्तीयं वाव रथन्तरमसौ
बृहदाभ्यामेव यन्त्यथो अनयोरेव प्रति तिष्ठन्त्येते वै यज्ञस्याञ्जसायनी
स्रुती ताभ्यामेव सुवर्गं लोकं – [] 18

TS 7.3.7.3 - Padam

गौः । असौ । आयुः । इमान् । एव । लोकान् ।

अभ्यारोहन्तीत्यभि – आरोहन्ति । यत् । अन्यतः । पृष्ठानि । स्युः ।

विविधमिति वि – विवधम् । स्यात् । मद्ध्ये । पृष्ठानि । भवन्ति ।

सविवधत्वायेति सविवध – त्वाय । ओजः । वै । वीर्यम् । पृष्ठानि ।

ओजः॑ । ए॒व । वी॒र्य॑म् । म॒द्ध्य॑तः । द॒ध॒ते ।
बृ॒ह॒द्र॒थ॒न्त॒रा॒भ्या॒मि॒ति॑ बृ॒ह॒त्-र॒थ॒न्त॒रा॒भ्या॑म् । य॒न्ति॑ । इ॒य॒म् । वा॒व ।
र॒थ॒न्त॒र॒मि॒ति॑ र॒थं - त॒र॒म् । अ॒सौ । बृ॒ह॒त् ।
आ॒भ्या॒म् । ए॒व । य॒न्ति॑ । अ॒थो इ॒ति॑ । अ॒न॒योः॑ । ए॒व । प्र॒ती॒ति॑ ।
ति॒ष्ठ॒न्ति॑ । ए॒ते इ॒ति॑ । वै । य॒ज्ञ॒स्य॑ ।
अ॒ञ्ज॒सा॒य॒नी इ॒त्य॒ञ्ज॒सा-अ॒य॒नी । स्रु॒ती इ॒ति॑ । ता॒भ्या॑म् । ए॒व ।
सु॒व॒र्ग॒मि॒ति॑ सु॒वः - ग॒म् । लो॒क॒म् । 18 (50)

TS 7.3.7.4

य॑न्ति॒ प॒रा॒ञ्चो॑ वा ए॒ते सु॒व॒र्गं लो॒क॒म॒भ्या॒रो॒ह॒न्ति॑ ये प॒रा॒ची॒ना॒नि
पृ॒ष्ठान्यु॑प॒य॒न्ति॑ प्र॒त्यङ् न्य॒हो भ॑वति प्र॒त्य॒व॒रू॒ढ्या अ॒थो प्र॑ति॒ष्ठि॒त्या
उ॒भ॒यो॒र्लो॒क॒यो॒र्ऋ॒द्ध्वो॑त् ति॒ष्ठ॒न्ति॑ प॒ञ्च॒द॒शै॒ता॒स्ता॒सां या॑ द॒श
द॒शा॒क्ष॒रा वि॒रा॒ड॒न्नं वि॒रा॒ड् वि॒रा॒जै॒वा॒न्ना॒द्य॒म॒व रु॑न्ध॒ते याः प॒ञ्च
प॒ञ्च दि॒शो दि॒क्ष्वे॒व प्र॑ति॒ ति॒ष्ठ॒न्त्य॒ति॒रा॒न्ना॒व॒भि॒तो भ॑वत इ॒न्द्रि॒य॒स्य
वी॒र्य॑स्य प्र॒जा॒यै () प॒शू॒नां प॑रिगृही॒त्यै ॥ 19

TS 7.3.7.4 - Padam

य॒न्ति॑ । प॒राञ्चः॑ । वै । ए॒ते । सु॒व॒र्गमि॑ति सु॒वः॑ – ग॒म् । लो॒कम् ।
अ॒भ्या॒रो॒ह॒न्तीत्य॑भि – आ॒रो॒ह॒न्ति॑ । ये । प॒रा॒ची॒ना॒नि । पृ॒ष्ठानि॑ ।
उ॒प॒य॒न्तीत्यु॑प – य॒न्ति॑ । प्र॒त्यङ् । त्र्य॒ह इति॑ त्रि – अ॒हः । भ॒व॒ति॑ ।
प्र॒त्य॒व॒रू॒ढ्या इति॑ प्र॒ति – अ॒व॒रू॒ढ्यै । अथो॒ इति॑ । प्र॒ति॒ष्ठि॒त्या इति॑
प्र॒ति – स्ति॒त्यै । उ॒भयोः॑ । लो॒कयोः॑ । ऋ॒द्ध्वा । उ॒दि॒ति । ति॒ष्ठन्ति॑ ।
प॒ञ्च॒द॒शेति॑ प॒ञ्च – द॒श । ए॒ताः । ता॒साम् । याः । द॒श ।
द॒शाक्ष॑रेति॒ द॒श – अ॒क्ष॒रा । वि॒राडि॑ति वि – राट् । अ॒न्नम् ।
वि॒राडि॑ति वि – राट् । वि॒रा॒जेति॑ वि – रा॒जा । ए॒व ।
अ॒न्नाद्य॑मित्य॒न्न – अ॒द्यम् । अ॒वेति॑ । रु॒न्ध॒ते । याः । प॒ञ्च । प॒ञ्च ।
दि॒शः । दि॒क्षु । ए॒व । प्र॒तीति॑ । ति॒ष्ठन्ति॑ । अ॒ति॒रा॒त्रा॒वि॒त्यति॑ – रा॒त्रौ ।
अ॒भि॒तः । भ॒व॒तः । इ॒न्द्रि॒यस्य॑ । वी॒र्य॑स्य । प्र॒जा॒या इति॑
प्र – जा॒यै () । प॒शूना॑म् । परि॒गृ॒ही॒त्या इति॑ परि – गृ॒ही॒त्यै ॥ 19

(52) (ग॒च्छ॒न्त्यग्नि॑ष्टु॒ता पा॒प्मानं॑ नि॒र॒न्तरि॑क्षं – लो॒कं – प्र॒जा॒यै –
द्वे च) (A7)

TS 7.3.8.1

प्र॒जाप॑ति-र॒काम॑यतान्नादः स्या॒मिति॑ स ए॒तꣳ स॑प्तदशरा॒त्र-म॑पश्यत्
तमाऽह॑रत् तेना॒यज॑त ततो॒ वै सोऽन्ना॑दोऽभ॒वद्य॑ एवं वि॒द्वाꣳसः
सप्त॑दश-रा॒त्रमा॑सते ऽन्ना॒दा ए॒व भ॑वन्ति पञ्चा॒हो भ॑वति पञ्च॒ वा
ऋ॒तवः॑ सँव॒थ्सर॑ ऋ॒तुष्वे॒व सँव॒थ्सरे॑ प्रति तिष्ठन्त्यथो पञ्चाक्ष॑रा
पङ्क्तिः॑ पाङ्क्तो॒ यज्ञो॑ य॒ज्ञमे॒वाऽव॑ रुन्धते ऽस॒त्रं वा॑ ए॒त- [] 20

TS 7.3.8.1 - Padam

प्र॒जाप॑तिरिति॑ प्र॒जा - प॒तिः । अ॒काम॑यत । अ॒न्नाद॑ इत्यन्न - अ॒दः ।
स्या॒म् । इति॑ । सः । ए॒तम् । स॒प्तद॑शरा॒त्रमिति॑ सप्तदश - रा॒त्रम् ।
अ॒पश्य॑त् । तम् । ए॒ति । अ॒हर॑त् । तेन॑ । अ॒यज॑त । ततः॑ । वै ।
सः । अ॒न्नाद॑ इत्यन्न - अ॒दः । अ॒भव॑त् । ये । ए॒वम् । वि॒द्वाꣳसः ।
स॒प्तद॑शरा॒त्रमिति॑ सप्तदश-रा॒त्रम् । आ॑सते । अ॒न्नादा॑ इत्यन्न-अ॒दाः ।
ए॒व । भ॑वन्ति । पञ्चा॒ह इति॑ पञ्च - अ॒हः । भ॑वति । पञ्च॒ । वै ।
ऋ॒तवः॑ । सँव॒थ्सर॑ इति॑ सं - व॒थ्सरः॑ । ऋ॒तुषु॑ । ए॒व ।
सँव॒थ्सर॑ इति॑ सं - व॒थ्सरे॑ । प्र॒तीति॑ । तिष्ठ॑न्ति । अथो॒ इति॑ ।

पञ्चाक्षरेति पञ्च – अक्षरा । पङ्क्तिः । पाङ्क्तः । यज्ञः । यज्ञम् । एव ।
अवेति । रुन्धते । असन्नम् । वै । एतत् । 20 (50)

TS 7.3.8.2

– द्यदछन्दोमं यच्छन्दोमा भवन्ति तेन सन्नं देवता एव पृष्ठैरव
रुन्धते पशूञ्छन्दोमैरोजो वै वीर्यं पृष्ठानि पशवः छन्दोमा ओजस्येव
वीर्यं पशुषु प्रति तिष्ठन्ति सप्तदशरात्रो भवति सप्तदशः प्रजापतिः
प्रजापतेराप्त्या अतिरात्रावभितो भवतोऽन्नाद्यस्य परिगृहीत्यै ॥ 21

TS 7.3.8.2 - Padam

यत् । अछन्दोममित्यछन्दः – मम् । यत् । छन्दोमा इति छन्दः – माः ।
भवन्ति । तेन । सन्नम् । देवताः । एव । पृष्ठैः । अवेति । रुन्धते ।
पशून् । छन्दोमैरिति छन्दः – मैः । ओजः । वै । वीर्यम् । पृष्ठानि ।
पशवः । छन्दोमा इति छन्दः – माः । ओजसि । एव । वीर्यं ।
पशुषु । प्रतीति । तिष्ठन्ति । सप्तदशरात्र इति सप्तदश – रात्रः ।
भवति । सप्तदश इति सप्त – दशः । प्रजापतिरिति प्रजा – पतिः ।
प्रजापतेरिति प्रजा – पतेः । आप्त्यै । अतिरात्रावित्यति – रात्रौ ।

अ॒भितः॑ । भवतः॑ । अ॒न्नाद्य॑स्येत्यन्न – अद्य॑स्य । परि॑गृहीत्या इति॑
परि॑ – गृही॒त्यै ॥ 21 (37) (एत॑त् – स॒प्तत्रिं॑श्च) (A8)

TS 7.3.9.1

सा वि॒राड् वि॒क्रम्या॑तिष्ठद्-ब्र॒ह्मणा॑ दे॒वेष्व॑न्नेना-सु॒रेषु॑ ते दे॒वा
अ॒काम॑यन्तोभय॑ सं वृ॒ज्जीम॑हि ब्र॒ह्म चा॒न्नं चेति॑ त ए॒ता
वि॒श्र॑तिं रा॒त्रीर॑पश्यन् ततो॑ वै त उ॒भय॑ सम॒वृज्ज॑त ब्र॒ह्म
चा॒न्नं च॑ ब्र॒ह्मव॑र्चसिनोऽन्ना॒दा अ॑भवन्. य ए॒वं वि॒द्वाँस॑ ए॒ता
आ॒स॒त उ॒भय॑मे॒व सँ वृ॒ज्ज॑ते ब्र॒ह्म चा॒न्नं च॑ – [] 22

TS 7.3.9.1 - Padam

सा । वि॒राडि॑ति वि – राट् । वि॒क्रम्ये॑ति वि – क्रम्य । अ॒ति॒ष्ठ॒त् ।
ब्र॒ह्मणा॑ । दे॒वेषु॑ । अ॒न्नेन॑ । अ॒सुरे॑षु । ते । दे॒वाः । अ॒काम॑यन्त ।
उ॒भय॑म् । स॒मि॒ति॑ । वृ॒ज्जीम॑हि । ब्र॒ह्म । च॒ । अ॒न्नम् । च॒ । इति॑ ।
ते । ए॒ताः । वि॒श्र॑तिम् । रा॒त्रीः । अ॒प॒श्य॑न् । ततः॑ । वै । ते ।
उ॒भय॑म् । स॒मि॒ति॑ । अ॒वृ॒ज्ज॑त । ब्र॒ह्म । च॒ । अ॒न्नम् । च॒ ।
ब्र॒ह्मव॑र्चसि॒न इति॑ ब्र॒ह्म – व॒र्च॒सि॒नः । अ॒न्ना॒दा इत्य॑न्न – अ॒दाः ।

अ॒भव॒न् । ये । ए॒वम् । वि॒द्वा॒ऽसः । ए॒ताः । आ॒स॒ते । उ॒भय॑म् ।
ए॒व । स॒मि॒ति । वृ॒ज्ज॒ते । ब्र॒ह्म । च । अ॒न्नम् । च । 22 (50)

TS 7.3.9.2

ब्र॒ह्मव॒र्च॒सि॒नो॑ऽन्ना॒दा भ॑वन्ति॒ द्वे वा ए॒ते वि॒राजौ॑ तयो॒रेव॑ ना॒ना प्र॒ति
ति॒ष्ठन्ति॑ वि॒ऽशो॑ वै पु॒रुषो॑ द॒श ह॒स्त्या अ॒ङ्गु॒लयो॑ द॒श प॒द्या या॒वा॒ने॒व
पु॒रुष॑स्त॒माप्त्वो॑त् ति॒ष्ठन्ति॑ ज्यो॒ति॒र्गौ॒रायु॑रिति॒ त्र्य॒हा भ॑वन्ती॒यं वा॒व
ज्यो॒ति॒रन्त॑रि॒क्षं गौ॒रसा॑वायु॒रि॒मा॒ने॒व लो॒का-न॒भ्या॒रो॒हन्त्य॑भि॒पूर्व
त्र्य॒हा भ॑वन्त्य॒भि॒पूर्व॑मे॒व सु॒वर्गं॑ - [] 23

TS 7.3.9.2 - Padam

ब्र॒ह्मव॒र्च॒सि॒न इति॑ ब्र॒ह्म - व॒र्च॒सि॒नः । अ॒न्ना॒दा इत्य॑न्न - अ॒दाः ।
भ॑वन्ति॒ । द्वे इति॑ । वै । ए॒ते इति॑ । वि॒राजा॑विति॒ वि-राजौ॑ । तयोः॑ ।
ए॒व । ना॒ना । प्र॒तीति॑ । ति॒ष्ठन्ति॑ । वि॒ऽशः । वै । पु॒रुषः । द॒श ।
ह॒स्त्याः । अ॒ङ्गु॒लयः । द॒श । प॒द्याः । या॒वा॒न् । ए॒व । पु॒रुषः । तम् ।
आ॒प्त्वा । उ॒दि॒ति । ति॒ष्ठन्ति॑ । ज्यो॒तिः । गौः । आ॒युः । इति॑ । त्र्य॒हा
इति॑ त्रि - अ॒हाः । भ॑वन्ति॒ । इ॒यम् । वा॒व । ज्यो॒तिः । अ॒न्त॑रि॒क्षम् ।

गौः । असौ । आयुः । इमान् । एव । लोकान् ।

अभ्यारोहन्तीत्यभि – आरोहन्ति । अभिपूर्वमित्यभि – पूर्वम् ।

त्र्यहा इति त्रि – अहाः । भवन्ति । अभिपूर्वमित्यभि – पूर्वम् ।

एव । सुवर्गमिति सुवः – गम् । 23 (50)

TS 7.3.9.3

लोकमभ्यारोहन्ति यदन्यतः पृष्ठानि स्युर्विविधः स्यान्मद्ध्ये
पृष्ठानि भवन्ति सविवधत्वायौजो वै वीर्यं पृष्ठान्योज एव वीर्यं
मद्ध्यतो दधते बृहद्-रथन्तराभ्यां यन्तीयं वाव रथन्तरमसौ
बृहदाभ्यामेव यन्त्यथो अनयोरेव प्रति तिष्ठन्त्येते वै
यज्ञस्याञ्जसायनी सुती ताभ्यामेव सुवर्गं लोकं यन्ति पराञ्चो
वा एते सुवर्गं () लोकमभ्यारोहन्ति ये पराचीनानि पृष्ठान्युपयन्ति
प्रत्यङ् त्र्यहो भवति प्रत्यवरूढ्या अथो प्रतिष्ठित्या उभयौलोकयोर्.
ऋद्ध्वोत् तिष्ठन्त्यतिरान्नावभितो भवतो ब्रह्मवर्चस-स्यान्नाद्यस्य
परिगृहीत्यै ॥ 24

TS 7.3.9.3 - Padam

लो॒कम् । अ॒भ्या॒रो॒ह॒न्ती॒त्य॒भि॒-आ॒रो॒ह॒न्ति॒ । यत् । अ॒न्य॒तः॑ । पृ॒ष्ठानि॑ ।
स्युः॑ । वि॒वि॒व॒ध॒मि॒ति॒ वि॒-वि॒व॒ध॒म् । स्या॒त् । म॒द्ध्ये॑ । पृ॒ष्ठानि॑ ।
भ॒व॒न्ति॒ । स॒वि॒व॒ध॒त्वा॒ये॒ति॒ स॒वि॒व॒ध॒-त्वा॒य॒ । ओ॒जः॑ । वै । वी॒र्य॑म् ।
पृ॒ष्ठानि॑ । ओ॒जः॑ । ए॒व । वी॒र्य॑म् । म॒द्ध्य॒तः॑ । द॒ध॒ते॒ ।
बृ॒ह॒द्र॒थ॒न्त॒रा॒भ्या॒मि॒ति॒ बृ॒ह॒त्-र॒थ॒न्त॒रा॒भ्या॒म् । य॒न्ति॒ । इ॒य॒म् । वा॒व ।
र॒थ॒न्त॒र॒मि॒ति॒ र॒थं॑-त॒र॒म् । अ॒सौ । बृ॒ह॒त् । आ॒भ्या॒म् । ए॒व । य॒न्ति॒ ।
अ॒थो॒ इति॑ । अ॒न॒योः॑ । ए॒व । प्र॒ती॒ति॒ । ति॒ष्ठ॒न्ति॒ । ए॒ते॒ इति॑ । वै ।
य॒ज्ञ॒स्य॑ । अ॒ज्ज॒सा॒य॒नी॒ इत्य॑ज्ज॒सा॒-अ॒य॒नी॒ । सु॒ती॒ इति॑ ।
ता॒भ्या॒म् । ए॒व । सु॒व॒र्ग॒मि॒ति॒ सु॒वः॑-ग॒म् । लो॒क॒म् । य॒न्ति॒ ।
प॒रा॒ञ्चः॑ । वै । ए॒ते॒ । सु॒व॒र्ग॒मि॒ति॒ सु॒वः॑-ग॒म् () । लो॒क॒म् ।
अ॒भ्या॒रो॒ह॒न्ती॒त्य॒भि॒-आ॒रो॒ह॒न्ति॒ । ये॒ । प॒रा॒ची॒ना॒नि॒ । पृ॒ष्ठानि॑ ।
उ॒प॒य॒न्ती॒त्यु॒प॒-य॒न्ति॒ । प्र॒त्य॒ङ् । त्र्य॒ह॒ इति॑ त्रि॒-अ॒हः॑ । भ॒व॒ति॒ ।
प्र॒त्य॒व॒रू॒ढ्या॒ इति॑ प्र॒ति॒-अ॒व॒रू॒ढ्यै॑ । अ॒थो॒ इति॑ । प्र॒ति॒ष्ठि॒त्या॒ इति॑
प्र॒ति॒-स्थि॒त्यै॑ । उ॒भ॒योः॑ । लो॒क॒योः॑ । ऋ॒द्ध्वा॒ । उ॒दि॒ति॒ । ति॒ष्ठ॒न्ति॒ ।

अति॒रा॒त्रा॒वि॒त्य॒ति॒ – रा॒त्रौ । अ॒भि॒तः॑ । भ॒व॒तः॑ । ब्र॒ह्म॒व॒र्च॒स॒स्ये॒ति॑
ब्र॒ह्म – व॒र्च॒स॒स्य॑ । अ॒न्ना॒द्य॒स्ये॒त्य॒न्न – अ॒द्य॒स्य॑ ।

परि॒गृ॒ही॒त्या॒ इति॒ परि॑ – गृ॒ही॒त्यै॑ ॥ 24 (73) (वृ॒ज्ज॒ते ब्र॒ह्म चां नं च॑
– सु॒व॒र्ग – मे॒ते सु॒व॒र्ग – त्रयो॑वि॒ंश॒तिश्च॑) (A9)

TS 7.3.10.1

अ॒सा॒वा॒दि॒त्योऽस्मिन्॑ लो॒क आ॒सीत् तं दे॒वाः पृ॒ष्ठैः परि॒गृ॒ह्य सु॒व॒र्गं
लो॒कम॑ग॒मय॑न् परै॒रव॑स्तात् पर्य॒गृ॒ह्णन् दि॒वाकी॒र्त्येन॑ सु॒व॒र्गे लो॒के
प्र॒त्य॒स्था॒पय॑न् परैः॑ पर॒स्तात् पर्य॑गृ॒ह्णन् पृ॒ष्ठैरु॒पावा॑रोह॒न्त्स वा
अ॒सा॒वा॒दि॒त्योऽमु॑ष्मिन् लो॒के परै॒रुभ॑यतः परि॒गृ॒ही॒तो यत् पृ॒ष्ठानि॑
भव॑न्ति सु॒व॒र्गमे॒व तैर्लो॒कं य॑ज॒माना॑ यन्ति॒ परै॒रव॑स्तात् परि॒ गृ॒ह्णन्ति॑
दि॒वाकी॒र्त्येन॑ – [] 25

TS 7.3.10.1 - Padam

अ॒सौ । आ॒दि॒त्यः । अ॒स्मिन् । लो॒के । आ॒सीत् । तम् । दे॒वाः ।
पृ॒ष्ठैः । परि॒गृ॒ह्येति॑ परि – गृ॒ह्य । सु॒व॒र्गमि॑ति सु॒वः – गम् । लो॒कम् ।

अ॒ग॒म॒य॒न् । प॒रैः॑ । अ॒व॒स्तात् । प॒री॒ति । अ॒गृ॒ह्ण॒न् । दि॒वा॒की॒र्त्ये॑नेति
दि॒वा – की॒र्त्ये॑न । सु॒व॒र्ग इति॑ सु॒वः – गे । लो॒के । प्र॒ती॒ति ।
अ॒स्था॒प॒य॒न् । प॒रैः॑ । प॒र॒स्तात् । प॒री॒ति । अ॒गृ॒ह्ण॒न् । पृ॒ष्ठैः॑ ।
उ॒पा॒वा॒रो॒ह॒न्नि॒त्युप॑ – अ॒वा॒रो॒ह॒न् । सः । वै । अ॒सौ । आ॒दि॒त्यः ।
अ॒मु॒ष्मि॒न् । लो॒के । प॒रैः॑ । उ॒भ॒य॒तः । प॒रि॒गृ॒ही॒त इति॑ प॒रि॒गृ॒ही॒तः ।
यत् । पृ॒ष्ठानि॑ । भ॒व॒न्ति । सु॒व॒र्ग॒मि॒ति सु॒वः – गम् । ए॒व । तैः ।
लो॒कम् । य॒ज॒मा॒नाः । य॒न्ति॑ । प॒रैः॑ । अ॒व॒स्तात् । प॒री॒ति । गृ॒ह्ण॒न्ति॑ ।
दि॒वा॒की॒र्त्ये॑नेति॑ दि॒वा – की॒र्त्ये॑न । 25 (50)

TS 7.3.10.2

सु॒व॒र्गे लो॒के प्र॒ति ति॒ष्ठन्ति॑ प॒रैः॑ प॒र॒स्तात् प॒रि गृ॒ह्ण॒न्ति पृ॒ष्ठैरु॒पा॒व॒रो॒ह॒न्ति॑
यत् प॒रे प॒र॒स्ता॒न्न स्युः॑ प॒राञ्चः॑ सु॒व॒र्गा॒ल्लो॒का॒न्नि॒ष्प॒द्ये॒रन् ।
य॒द॒व॒स्ता॒न्न स्युः॑ प्र॒जा निर्द॑हे॒युर॒भितो॑ दि॒वा॒की॒र्त्ये॑ प॒र॒स्सा॒मानो॑ भ॒व॒न्ति॑
सु॒व॒र्ग ए॒वैनां॑ लो॒क उ॒भ॒य॒तः प॒रि गृ॒ह्ण॒न्ति य॒ज॒मा॒ना वै दि॒वा॒की॒र्त्ये॑
सँव॒त्स॒रः प॒र॒स्सा॒मानो॑ऽभितो॑ दि॒वा॒की॒र्त्ये॑ प॒र॒स्सा॒मानो॑ भ॒व॒न्ति॑
सँव॒त्स॒र ए॒वो॒भ॒य॒तः – [] 26

TS 7.3.10.2 - Padam

सु॒वर्ग॑ इति॑ सुवः-गे । लो॒के । प्र॒तीति॑ । ति॒ष्ठन्ति॑ । परैः॑ । पर॒स्तात्॑ ।
परीति॑ । गृ॒ह्णन्ति॑ । पृ॒ष्ठैः । उ॒पाव॑रोह॒न्तीत्यु॑प – अ॒वरो॑हन्ति । यत् ।
परैः॑ । पर॒स्तात्॑ । न । स्युः॑ । परा॒ञ्चः॑ । सु॒वर्गादि॑ति सुवः – गात् ।
लो॒कात् । निरि॑ति । प॒द्ये॒रन् । यत् । अ॒वस्ता॑त् । न । स्युः॑ ।
प्र॒जा इति॑ प्र – जाः । निरि॑ति । द॒हे॒युः । अ॒भितः॑ । दि॒वाकी॑र्त्यमि॒ति॑
दि॒वा – की॒र्त्यम्॑ । पर॒स्सामा॑न इति॑ परः – सा॒मानः॑ । भ॒वन्ति॑ ।
सु॒वर्ग॑ इति॑ सुवः – गे । ए॒व । ए॒ना॒न् । लो॒के । उ॒भय॑तः । परीति॑ ।
गृ॒ह्णन्ति॑ । यज॑मानाः । वै । दि॒वाकी॑र्त्यमि॒ति॑ दि॒वा – की॒र्त्यम्॑ ।
सँ॒व॒थ्स॒र इति॑ सं – व॒थ्स॒रः । पर॒स्सामा॑न इति॑ परः – सा॒मानः॑ ।
अ॒भितः॑ । दि॒वाकी॑र्त्यमि॒ति॑ दि॒वा – की॒र्त्यम्॑ । पर॒स्सामा॑न इति॑
परः – सा॒मानः॑ । भ॒वन्ति॑ । सँ॒व॒थ्स॒र इति॑ सं – व॒थ्स॒रे । ए॒व ।
उ॒भय॑तः । 26 (50)

TS 7.3.10.3

प्रति॑ तिष्ठन्ति॑ पृ॒ष्ठं वै॑ दि॒वाकी॒र्त्यं पा॒र्श्वे पर॑स्सामा॒नो ऽभि॑तो
दि॒वाकी॒र्त्यं पर॑स्सामा॒नो भव॑न्ति॒ तस्मा॑द॒भितः॑ पृ॒ष्ठं पा॒र्श्वे
भूयि॑ष्ठा॒ ग्रहा॑ गृह्यन्ते॒ भूयि॑ष्ठं श॒स्यते॑ य॒ज्ञस्यै॒व तन्म॑द्ध्यतो
ग्रन्थिं॑ ग्र॒थन्त्य॑वि॒स्रञ्सा॒य स॒प्त गृह्य॑न्ते स॒प्त वै शी॑र्ष॒ण्याः॑
प्रा॒णाः प्रा॒णाने॒व यज॑मानेषु दधति॒ यत् परा॑ची॒नानि॑ पृ॒ष्ठानि॑
भव॑न्त्यमु॒मे॒व तै-लोक॑म॒भ्यारो॑हन्ति॒ यदि॑मं लो॒कं न - [] 27

TS 7.3.10.3 - Padam

प्रती॑ति । तिष्ठ॑न्ति । पृ॒ष्ठम् । वै । दि॒वाकी॒र्त्यमि॑ति दि॒वा - की॒र्त्यम् ।
पा॒र्श्वे इति॑ । पर॑स्सामा॒न इति॑ परः - सा॒मानः । अ॒भितः॑ ।
दि॒वाकी॒र्त्यमि॑ति दि॒वा - की॒र्त्यम् । पर॑स्सामा॒न इति॑ परः-सा॒मानः ।
भव॑न्ति । तस्मा॑त् । अ॒भितः॑ । पृ॒ष्ठम् । पा॒र्श्वे इति॑ । भूयि॑ष्ठाः । ग्रहाः॑ ।
गृह्य॑न्ते । भूयि॑ष्ठम् । श॒स्यते॑ । य॒ज्ञस्य॑ । ए॒व । तत् । म॑द्ध्यतः ।
ग्रन्थि॑म् । ग्र॒थन्ति॑ । अ॒वि॒स्रञ्सा॒येत्य॑वि - स्रञ्सा॒य । स॒प्त ।
गृह्य॑न्ते । स॒प्त । वै । शी॑र्ष॒ण्याः॑ । प्रा॒णा इति॑ प्र - अ॒नाः ।

प्रा॒णानि॑ति॒ प्र – अ॒नान् । ए॒व । यज॑मानेषु । द॒धति॑ । यत् ।

परा॒चीना॑नि । पृ॒ष्ठानि॑ । भव॑न्ति । अ॒मुम् । ए॒व । तैः । लो॒कम् ।

अ॒भ्या॒रो॒हन्ती॑त्यभि-आ॒रो॒हन्ति॑ । यत् । इ॒मम् । लो॒कम् । न । 27 (50)

TS 7.3.10.4

प्रत्य॑व-रो॒हे॒युरु॒द्धा मा॒द्ये॒युर्यज॑मानाः प्र वा मी॒येरन् । यत् प्र॒ती॒चीना॑नि
पृ॒ष्ठानि॑ भव॑न्तीममेव तैर्लो॒कं प्रत्य॑वरो॒हन्त्यथो॑ अ॒स्मिन्ने॒व लो॒के प्र॒ति
तिष्ठ॑न्त्यनु॒न्मादा॑येन्द्रो वा अ॒प्रति॑ष्ठित आसी॒थ् स प्र॒जाप॑ति-मु॒पाधा॑वत्
तस्मा॑ ए॒तमे॑कवि॒ंशति॑रात्रं प्राय॑च्छत् तमाऽह॑रत् तेना॑यजत॒ ततो॑ वै स
प्रत्य॑तिष्ठ॒द्ये बहु॑या॒जिनो॑ ऽप्रति॑ष्ठिताः – [] 28

TS 7.3.10.4 - Padam

प्रत्य॑वरो॒हे॒युरि॑ति॒ प्रति – अ॒वरो॒हे॒युः । उ॒दिति॑ । वा । मा॒द्ये॒युः ।

यज॑मानाः । प्रेति॑ । वा । मी॒येरन् । यत् । प्र॒ती॒चीना॑नि । पृ॒ष्ठानि॑ ।

भव॑न्ति । इ॒मम् । ए॒व । तैः । लो॒कम् । प्रत्य॑वरो॒हन्ती॑ति

प्रति – अ॒वरो॒हन्ति॑ । अथो॒ इति॑ । अ॒स्मिन् । ए॒व । लो॒के । प्र॒तीति॑ ।

तिष्ठन्ति । अनु॑न्मादा॒येत्यनु॑त् – मा॒दाय॑ । इन्द्रः॑ । वै । अप्रतिष्ठित॑
इत्यप्रति॑ – स्थि॒तः । आसी॑त् । सः । प्र॒जाप॑तिमि॒ति प्र॒जा-प॑तिम् ।
उपेति॑ । अधा॒वत् । तस्मै॑ । ए॒तम् ।

ए॒कवि॑ञ्शतिरा॒त्रमित्ये॑कवि॑ञ्शति – रा॒त्रम् । प्रेति॑ । अ॒यच्छ॑त् । तम् ।
एति॑ । अ॒हर॑त् । तेन॑ । अ॒यज॑त् । ततः॑ । वै । सः । प्र॒तीति॑ ।
अतिष्ठ॑त् । ये । बहु॒याजिन॑ इति॑ बहु – या॒जिनः॑ ।
अप्रतिष्ठिता॑ इत्यप्रति॑ – स्थि॒ताः । 28 (50)

TS 7.3.10.5

स्युस्त॑ ए॒कवि॑ञ्शति-रा॒त्रमा॑सीरन् द्वा॒दश॑ मा॒साः पञ्च॑र्तवस्त्रय॑ इमे
लो॒का अ॒सावा॑दित्य॑ ए॒कवि॑ञ्श ए॒ताव॑न्तो वै दे॒वलो॑कास्तेष्वे॒व यथा॑
पूर्व॑ प्रति॑ तिष्ठन्त्यसा॒वादि॑त्यो न व्य॒रोच॑त् स प्र॒जाप॑तिमु॒पाधा॑वत् तस्मा॑
ए॒तमे॑कवि॑ञ्शतिरा॒त्रं प्रा॑यच्छत् तमा॒हर॑त् तेना॒यज॑त् ततो॑ वै सो
ऽरो॑चत् य एवं वि॒द्वाञ्स॑ ए॒कवि॑ञ्शतिरा॒त्रमा॑सते () रोच॑न्त
ए॒वैक॑वि॑ञ्शतिरा॒त्रो भ॑वति॒ रुग्वा॑ ए॒कवि॑ञ्शो रुच॑मे॒व गच्छ॑न्त्यथो॑

प्रति॑ष्ठामे॒व प्रति॑ष्ठा ह्ये॒कवि॒ंशो॑ ऽति॒रात्रा॒व॒भितो॑ भवतो ब्रह्मवर्च॒सस्य॑
परि॑गृहीत्यै ॥ 29

TS 7.3.10.5 - Padam

स्युः । ते । ए॒कवि॒ंशति॑रात्रमित्ये॒कवि॒ंशति॑ – रा॒त्रम् । आ॒सीर॒न् ।
द्वाद॑श । मा॒साः । पञ्च॑ । ऋ॒तवः॑ । त्रयः॑ । इ॒मे । लो॒काः । अ॒सौ ।
आ॒दि॒त्यः । ए॒कवि॒ंश इत्ये॒क – वि॒ंशः॑ । ए॒ताव॑न्तः । वै ।
दे॒वलो॒का इति॑ दे॒व – लो॒काः । तेषु॑ । ए॒व । य॒थापू॒र्वमि॑ति
यथा – पू॒र्वम् । प्र॒तीति॑ । ति॒ष्ठन्ति॑ । अ॒सौ । आ॒दि॒त्यः । न । वी॒ति ।
अ॒रोच॑त । सः । प्र॒जाप॑तिमि॒ति प्र॒जा – प॒तिम् । उ॒पेति॑ । अ॒धाव॑त् ।
तस्मै॑ । ए॒तम् । ए॒कवि॒ंशति॑रात्रमित्ये॒कवि॒ंशति॑ – रा॒त्रम् । प्रे॒ति ।
अ॒यच्छ॑त् । तम् । ए॒ति । अ॒हर॑त् । ते॒न । अ॒यज॑त । ततः॑ । वै । सः ।
अ॒रोच॑त । ये । ए॒वम् । वि॒द्वाँसः॑ ।
ए॒कवि॒ंशति॑रात्रमित्ये॒कवि॒ंशति॑ – रा॒त्रम् । आ॒सते॑ () । रोच॑न्ते ।
ए॒व । ए॒कवि॒ंशति॑रात्र इत्ये॒कवि॒ंशति॑ – रा॒त्रः । भ॒वति॑ ।
रुक् । वै । ए॒कवि॒ंश इत्ये॒क – वि॒ंशः॑ । रुच॑म् । ए॒व ।

गच्छन्ति । अथो इति । प्रतिष्ठामिति प्रति – स्थाम् । एव ।

प्रतिष्ठेति प्रति – स्था । हि । एकविंश इत्येक – विंशः ।

अतिरात्रावित्यति – रात्रौ । अभितः । भवतः ।

ब्रह्मवर्चसस्येति ब्रह्म – वर्चसस्य ।

परिगृहीत्या इति परि – गृहीत्यै ॥ 29 (71) (गृह्णन्ति दिवाकीर्त्येनै –
वोभयतो – ना – प्रतिष्ठिता – आसत – एकविंशतिश्च) (A10)

TS 7.3.11.1

अर्वाङ् यज्ञः सं क्रामत्वमुष्मादधि मामभि ।

ऋषीणां यः पुरोहितः ॥

निर्देवं निर्वीरं कृत्वा विष्कन्धं तस्मिन् हीयतां योऽस्मान् द्वेष्टि ।

शरीरं यज्ञशमलं कुसीदं तस्मिन्त्सीदतु योऽस्मान् द्वेष्टि ॥

यज्ञ यज्ञस्य यत् तेजस्तेन संक्राम मामभि ।

ब्राह्मणानृत्विजो देवान् यज्ञस्य तपसा ते सवाहमा हुवे ॥

इष्टेन पक्वमुप – [] 30

TS 7.3.11.1 - Padam

अ॒र्वाङ् । य॒ज्ञः । स॒मि॒ति॑ । क्रा॒म॒तु॑ । अ॒मुष्मा॑त् । अधी॑ति॒ । मा॒म् ।
अ॒भि ॥ ऋ॒षी॑णाम् । यः । पु॒रोहि॑त॒ इति॑ पु॒रः – हि॒तः ॥ निर्दे॑वमि॒ति॒
निः – दे॒वम् । निर्वी॑रमि॒ति॒ निः – वी॒रम् । कृ॒त्वा । विष्क॑न्धमि॒ति॒
वि – स्क॑न्धम् । तस्मि॑न् । ही॒य॒ता॒म् । यः । अ॒स्मान् । द्वेष्टि॑ ॥
शरी॑रम् । य॒ज्ञ॒श॒म॒ल॒मि॒ति॑ य॒ज्ञ – श॒म॒ल॒म् । कु॒सी॑दम् । तस्मि॑न् ।
सी॒द॒तु॑ । यः । अ॒स्मान् । द्वेष्टि॑ ॥ य॒ज्ञ । य॒ज्ञ॒स्य॑ । यत् । तेजः॑ । तेन॑ ।
स॒मि॒ति॑ । क्रा॒म॒ । मा॒म् । अ॒भि ॥ ब्रा॒ह्म॒णान् । ऋ॒त्वि॒जः॑ । दे॒वान् ।
य॒ज्ञ॒स्य॑ । तप॑सा । ते । स॒व॒ । अ॒हम् । ए॒ति॑ । हु॒वे ॥ इ॒ष्टेन॑ ।
प॒क्वम् । उपे॑ति॒ । 30 (50)

TS 7.3.11.2

ते हु॒वे स॒वा॒हं॑ ।
सं ते वृ॒ज्जे सु॒कृ॒तꣳ सं प्र॒जां प॒शून् ॥
प्रैषा॑न्थ्-सा॒मि॒धे॒नी-रा॒घा॒रा॒वा॒ज्य॒भा॒गा॒वा-श्रु॑तं प्र॒त्याश्रु॑त॒मा शृ॑णामि ते ।
प्र॒या॒जा॒नू॒या॒जा॒न्थ्-स्वि॑ष्ट॒कृ॒त-मि॒डा॒मा॒शि॒ष आ वृ॒ज्जे सु॒वः ॥

अ॒ग्नि॒ने॒न्द्रे॒ण॒ सो॒मे॒न॒ सर॒स्व॒त्या॒ वि॒ष्णु॒ना॒ दे॒वता॑भिः ।

या॒ज्या॒नु॒वा॒क्या॑भ्या॒मुप॑ ते हु॒वे स॒वा॒हं य॒ज्ञ॒मा द॑दे ते व॒षट्कृतं॑ ॥

स्तु॒त॒श्च॑ श॒स्त्रं॑ प्र॒ति॒गरं॑ ग्र॒ह॒मि॒डा॒मा॒शि॒ष – [] 31

TS 7.3.11.2 - Padam

ते । हु॒वे । स॒व । अ॒हम् ॥ स॒मि॒ति । ते । वृ॒ज्जे । सु॒कृत॑मि॒ति

सु – कृत॑म् । स॒मि॒ति । प्र॒जा॒मि॒ति प्र – जा॑म् । प॒शून् ॥ प्रै॒षा॒नि॒ति

प्र – ए॒षान् । सा॒मि॒धे॒नी॒रि॒ति सां – इ॒धे॒नीः । आ॒घा॒रा॒वि॒त्या॑-घा॒रौ ।

आ॒ज्य॑भा॒गा॒वि॒त्या॒ज्य – भा॒गौ । आ॒श्रु॒त॒मि॒त्या – श्रु॒तम् ।

प्र॒त्या॒श्रु॒त॒मि॒ति प्र॒ति – आ॒श्रु॒तम् । ए॒ति । शृ॒णामि॑ । ते ॥

प्र॒या॒जा॒नू॒या॒जा॒नि॒ति प्र॒या॒ज – अ॒नू॒या॒जान् । स्वि॒ष्ट॒कृत॑मि॒ति

स्वि॒ष्ट – कृत॑म् । इ॒डाम् । आ॒शि॒ष इ॒त्या – शि॒षः । ए॒ति । वृ॒ज्जे ।

सु॒वः ॥ अ॒ग्नि॒ना । इ॒न्द्रे॒ण । सो॒मे॒न । सर॒स्व॒त्या । वि॒ष्णु॒ना ।

दे॒वता॑भिः ॥ या॒ज्या॒नु॒वा॒क्या॑भ्या॒मि॒ति या॒ज्या – अ॒नु॒वा॒क्या॑भ्याम् ।

उ॒पे॒ति । ते । हु॒वे । स॒व । अ॒हम् । य॒ज्ञम् । ए॒ति । द॒दे । ते ।

व॒षट्कृत॑मि॒ति व॒षट् – कृत॑म् ॥ स्तु॒तम् । श॒स्त्रम् । प्र॒ति॒गर॑मि॒ति
प्र॒ति – ग॒रम् । ग्र॒हम् । इ॒डाम् । आ॒शिष॑ इ॒त्या – शिषः॑ । 31 (50)

TS 7.3.11.3

आ वृ॒ज्जे सु॒वः ।

प॒त्नीसँ॑या॒जानु॑प॒ ते हु॒वे स॒वाह॑ꣳ स॒मिष्ट॑य॒जुरा द॑दे॒ तव॑ ॥

प॒शून्थ्-सु॒तं पु॒रोडा॑शा॒न्थ्-स॒वनान्यो॑त॒ यज्ञं॑ ।

दे॒वान्थ्-से॒न्द्रानु॑प॒ ते हु॒वे स॒वाह॑-म॒ग्निमु॑खा॒न्थ्-सोम॑व॒तो ये च॒
वि॒श्वे ॥ 32

TS 7.3.11.3 - Padam

ए॒ति । वृ॒ज्जे । सु॒वः ॥ प॒त्नीसँ॑या॒जानि॑ति॒ पत्नी॑-सँ॒या॒जान् । उ॒पेति॑ ।
ते । हु॒वे । स॒व । अ॒हम् । स॒मिष्ट॑य॒जुरि॑ति॒ समिष्ट॑ – य॒जुः । ए॒ति ।
द॒दे । तव॑ ॥ प॒शून् । सु॒तम् । पु॒रोडा॑शान् । स॒वनानि॑ । ए॒ति । उ॒त ।
य॒ज्ञम् ॥ दे॒वान् । से॒न्द्रानि॑ति॒ स-इ॒न्द्रान् । उ॒पेति॑ । ते । हु॒वे । स॒व ।
अ॒हम् । अ॒ग्निमु॑खा॒नित्य॑ग्नि – मु॒खान् । सोम॑व॒त इति॑ सोम॑-व॒तः ।
ये । च॒ । वि॒श्वे ॥ 32 (32) (उ॒प – ग्र॒हमि॑डा॒माशि॑षो – द्वा॒त्रिंश॑च्च)
(A11)

TS 7.3.12.1

भू॒तं॑ भ॒व्यं॑ भ॒वि॒ष्य॒द्व॒ष॒ट्॒थ् स्वा॒हा नम॑ ऋ॒ख् सा॒म य॒जुर्व॒ष॒ट्॒थ् स्वा॒हा
नमो॑ गा॒य॒त्री त्रि॒ष्टु॒ब् जग॑ती व॒ष॒ट्॒थ् स्वा॒हा नमः॑ पृ॒थि॒व्यन्त॑रि॒क्षं
द्यौ॑ व॒ष॒ट्॒थ् स्वा॒हा नमो॑ ऽग्नि॒र्वा॒युः सूर्यो॑ व॒ष॒ट्॒थ् स्वा॒हा नमः॑ प्रा॒णो-
व्या॒नो-ऽपा॒नो व॒ष॒ट्॒थ् स्वा॒हा नमो॑ ऽन्नं॑ कृ॒षि-वृ॒ष्टि-व॒ष॒ट्॒थ् स्वा॒हा
नमः॑ पि॒तापु॒त्रः पौ॒त्रो व॒ष॒ट्॒थ् स्वा॒हा नमो॑ भू॒र्भुवः॑ () सु॒व व॒ष॒ट्॒थ्
स्वा॒हा नमः॑ ॥ 33

TS 7.3.12.1 - Padam

भू॒तम् । भ॒व्यम् । भ॒वि॒ष्य॒त् । व॒ष॒ट् । स्वा॒हा । नमः॑ । ऋ॒क् । सा॒म ।
य॒जुः । व॒ष॒ट् । स्वा॒हा । नमः॑ । गा॒य॒त्री । त्रि॒ष्टु॒प् । जग॑ती । व॒ष॒ट् ।
स्वा॒हा । नमः॑ । पृ॒थि॒वी । अ॒न्त॑रि॒क्षम् । द्यौः॑ । व॒ष॒ट् । स्वा॒हा ।
नमः॑ । अ॒ग्निः । वा॒युः । सूर्यः॑ । व॒ष॒ट् । स्वा॒हा । नमः॑ । प्रा॒ण इति॑
प्र - अ॒नः । व्या॒न इति॑ वि - अ॒नः । अ॒पा॒न इत्य॑प-अ॒नः । व॒ष॒ट् ।
स्वा॒हा । नमः॑ । अ॒न्नम् । कृ॒षिः । वृ॒ष्टिः । व॒ष॒ट् । स्वा॒हा । नमः॑ ।
पि॒ता । पु॒त्रः । पौ॒त्रः । व॒ष॒ट् । स्वा॒हा । नमः॑ । भूः॑ । भु॒वः () ।

सुवः॑ । वषट्॑ । स्वाहा॑ ॥ नमः॑ ॥ 33 (54)

(भुव॑ – श्रुत्वारि॑ च) (A12)

TS 7.3.13.1

आ मे॑ गृहा॑ भव॒न्त्वा प्र॒जा म॒ आ मा॑ य॒ज्ञो वि॑शतु वी॒र्या॑वान् ।
आपो॑ दे॒वीर्य॒ज्ञिया॒ माऽऽवि॑शन्तु स॒हस्र॑स्य मा भू॒मा मा प्र॑ हासीत् ॥
आ मे॑ ग्र॒हो भव॒त्वा पु॒रोरु॒ख् स्तु॑तश॒स्त्रे मा ऽऽवि॑शता॒ समी॑ची ॥
आदि॒त्या रु॒द्रा वस॑वो मे सद॒स्याः स॒हस्र॑स्य मा भू॒मा मा प्र॑ हासीत् ॥
आ माऽऽग्नि॑ष्टो॒मो वि॑शतू () कथ्य॑श्चाति॒रात्रो॒ माऽऽ वि॑शत्वापि॒शर्व॑रः ।
तिरो॑अ॒हिया॒ मा सु॒हुता॒ आ वि॑शन्तु स॒हस्र॑स्य मा भू॒मा मा
प्र॑ हासीत् ॥ 34

TS 7.3.13.1 - Padam

एति॑ । मे॒ । गृहाः॑ । भव॒न्तु॒ । एति॑ । प्र॒जेति॑ प्र – जा । मे॒ । एति॑ ।
मा॒ । य॒ज्ञः । वि॒शतु॑ । वी॒र्या॑वानिति॑ वी॒र्य – वा॒न् ॥ आपः॑ । दे॒वीः ।
य॒ज्ञियाः॑ । मा॒ । एति॑ । वि॒शन्तु॑ । स॒हस्र॑स्य । मा॒ । भू॒मा । मा॒ ।

प्रेति॑ । हा॒सीत् ॥ एति॑ । मे॒ । ग्रहः॑ । भवतु॑ । एति॑ । पुरो॒रुगिति॑
 पुरः – रुक् । स्तुत॑शस्त्रे इति॑ स्तुत – शस्त्रे॑ । मा॒ । एति॑ ।
 विशता॑म् । समी॒ची इति॑ ॥ आ॒दि॒त्याः । रु॒द्राः । वसवः॑ । मे॒ ।
 सद॒स्याः । सह॒स्रस्य॑ । मा॒ । भू॒मा । मा॒ । प्रेति॑ । हा॒सीत् ॥ एति॑ ।
 मा॒ । अ॒ग्नि॒ष्टोम॑ इत्यग्नि – स्तोमः॑ । विशतु॑ () । उक्थ्यः॑ । च॒ ।
 अति॑रात्र इत्यति – रात्रः॑ । मा॒ । एति॑ । विशतु॑ । आपि॒शर्व॑र
 इत्यापि॑ – शर्व॑रः ॥ तिरोअ॒हिया॑ इति॑ तिरः – अ॒हियाः॑ । मा॒ ।
 सुहु॑ता इति॑ सु – हु॒ताः । एति॑ । विशन्तु॑ । सह॒स्रस्य॑ । मा॒ । भू॒मा ।
 मा॒ । प्रेति॑ । हा॒सीत् ॥ 34 (68)

(अ॒ग्नि॒ष्टोमो॑ वि॒शत्व॑ – षा॒दश॑ च) (A13)

TS 7.3.14.1

अ॒ग्निना॑ तपोऽन्व॑भवद्-वा॒चा ब्र॒ह्म म॒णिना॑ रूपा॒णीन्द्रे॑ण दे॒वान् वा॒तेन॑
 प्रा॒णान्त् सूर्ये॑ण द्वां च॒न्द्रम॑सा नक्ष॒त्राणि॑ यमे॒न पि॒तृन् रा॒ज्ञा म॒नुष्या॑न्
 फ॒लेन॑ नादे॒यान॑जगरेण सर्पा॑न् व्याघ्रे॑णाऽऽ*र॒ण्यान् प॒शूञ्छ्ये॑नेन
 प॒त॒त्रिणो॑ वृ॒ष्णाऽश्वा॑नृष॒भेण॑ गा ब॒स्तेना॑जा वृ॒ष्णिना॑ऽवी॒र्व्रीहि॑णाऽन्ना॒नि

यवे॑नौष॑धी॒न्य॒ग्रोधे॑न॒ वन॒स्पती॑नु॒दु॒म्बरे॑णोर्जं॑ गाय॒त्रिया॑ छन्दा॒सि त्रि॒वृता॑
स्तो॒मान्॑ ब्रा॒ह्म॒णेन॑ () वाचं॑ ॥ 35

TS 7.3.14.1 - Padam

अ॒ग्निना॑ । तपः॑ । अ॒न्विति॑ । अ॒भ॒वत् । वा॒चा । ब्र॒ह्म । म॒णिना॑ ।
रू॒पाणि॑ । इ॒न्द्रेण॑ । दे॒वान् । वा॒तेन॑ । प्रा॒णानि॑ति प्र – अ॒नान् ।
सू॒र्येण॑ । द्याम् । च॒न्द्रम॑सा । नक्ष॑त्राणि । य॒मेन॑ । पि॒तृन् । रा॒ज्ञा ।
म॒नु॒ष्यान् । फ॒लेन॑ । ना॒दे॒यान् । अ॒जग॑रेण । सर्पा॑न् । व्याघ्रे॑ण ।
आ॒र॒ण्यान् । प॒शून् । श्ये॒नेन॑ । प॒त॒त्रिणः॑ । वृ॒ष्णा । अ॒श्वान् ।
ऋ॒ष॒भेण॑ । गाः । ब॒स्तेन॑ । अ॒जाः । वृ॒ष्णिना॑ । अ॒वीः । व्री॒हिणा॑ ।
अ॒न्ना॒नि । यवे॑न । ओष॑धीः । न्य॒ग्रोधे॑न । वन॒स्पती॑न् । उ॒दु॒म्बरे॑ण ।
ऊ॒र्जम् । गा॒य॒त्रिया॑ । छन्दा॒सि । त्रि॒वृते॑ति त्रि – वृ॒ता । स्तो॒मान् ।
ब्रा॒ह्म॒णेन॑ () । वाच॑म् ॥ 35 (51) (ब्रा॒ह्म॒णेनै॑ – कं॑ च) (A14)

TS 7.3.15.1

स्वाहा॑ऽऽधि॒माधी॑ताय॒ स्वाहा॑ स्वाहा॑ऽऽधी॒तं मन॑से॒ स्वाहा॑ स्वाहा॑ मनः॑
प्र॒जाप॑तये॒ स्वाहा॑ का॒य स्वाहा॑ कस्मै॑ स्वाहा॑ क॒तम॑स्मै॒ स्वाहा॑ ऽदि॒त्यै

स्वाहा॑ ऽदि॒त्यै॑ म॒ह्यै॑ स्वाहा॑ ऽदि॒त्यै॑ सु॒मृ॒डी॒का॒यै॑ स्वाहा॑ सर॒स्व॒त्यै॑ स्वाहा॑
सर॒स्व॒त्यै॑ बृ॒ह॒त्यै॑ स्वाहा॑ सर॒स्व॒त्यै॑ पा॒व॒का॒यै॑ स्वाहा॑ पू॒ष्णे॑ स्वाहा॑
पू॒ष्णे॑ प्र॒प॒थ्या॑य स्वाहा॑ पू॒ष्णे॑ न॒र॒न्धि॒षाय॑ स्वाहा॑ त्वष्ट्रे॑ स्वाहा॑ त्वष्ट्रे॑
तु॒री॒पा॒य॑ स्वाहा॑ त्वष्ट्रे॑ पु॒रु॒रूपा॑य स्वाहा॑ () वि॒ष्ण॒वे॑ स्वाहा॑
वि॒ष्ण॒वे॑ नि॒खुर्य॑पाय स्वाहा॑ वि॒ष्ण॒वे॑ नि॒भूय॑पाय स्वाहा॑ सर्व॑स्मै
॥
स्वाहा॑ ॥ 36

TS 7.3.15.1 - Padam

स्वाहा॑ । आ॒धि॒मि॒त्या॑ – धि॒म् । आ॒धी॒ता॒ये॒त्या॑ – धी॒ता॒य॑ । स्वाहा॑ ।
स्वाहा॑ । आ॒धी॒त॒मि॒त्या॑ – धी॒त॒म् । म॒न॒से॑ । स्वाहा॑ । स्वाहा॑ । म॒नः॑ ।
प्र॒जा॒प॒तय॑ इति॑ प्र॒जा – प॒त॒ये॑ । स्वाहा॑ । का॒य॑ । स्वाहा॑ । क॒स्मै॑ ।
स्वाहा॑ । क॒त॒म॒स्मै॑ । स्वाहा॑ । अ॒दि॒त्यै॑ । स्वाहा॑ । अ॒दि॒त्यै॑ । म॒ह्यै॑ ।
स्वाहा॑ । अ॒दि॒त्यै॑ । सु॒मृ॒डी॒का॒या॑ इति॑ सु – मृ॒डी॒का॒यै॑ । स्वाहा॑ ।
सर॒स्व॒त्यै॑ । स्वाहा॑ । सर॒स्व॒त्यै॑ । बृ॒ह॒त्यै॑ । स्वाहा॑ । सर॒स्व॒त्यै॑ ।
पा॒व॒का॒यै॑ । स्वाहा॑ । पू॒ष्णे॑ । स्वाहा॑ । पू॒ष्णे॑ । प्र॒प॒थ्या॑येति॑
प्र–प॒थ्या॑य । स्वाहा॑ । पू॒ष्णे॑ । न॒र॒न्धि॒षाय॑ । स्वाहा॑ । त्वष्ट्रे॑ । स्वाहा॑ ।

त्वष्ट्रे॑ । तुरी॑पाय । स्वाहा॑ । त्वष्ट्रे॑ । पुरु॑रूपायेति॑ पुरु – रूपाय॑ ।

स्वाहा॑ () । विष्ण॑वे । स्वाहा॑ । विष्ण॑वे ।

नि॒खुर्य॑पायेति॑ नि॒खुर्य॑ – पाय॑ । स्वाहा॑ । विष्ण॑वे । नि॒भूय॑पायेति॑

नि॒भूय॑ – पाय॑ । स्वाहा॑ । सर्व॑स्मै । स्वाहा॑ ॥ 36 (60)

(पुरु॑रूपाय॑ स्वाहा॑ – दश॑ च) (A15)

TS 7.3.16.1

द॒द्भ्यः॑ स्वाहा॑ ह॒नूभ्या॑ स्वाहा॑ ऽहो॒ष्ठाभ्या॑ स्वाहा॑ मु॒खाय॑ स्वाहा॑

ना॒सिका॑भ्या॑ स्वाहा॑ ऽक्षी॑भ्या॑ स्वाहा॑ क॒र्णाभ्या॑ स्वाहा॑

पा॒र इ॒क्षवो॑ ऽवा॒र्येभ्यः॑ प॒क्ष्मभ्यः॑ स्वाहा॑ ऽवा॒र इ॒क्षवः॑ पा॒र्येभ्यः॑

प॒क्ष्मभ्यः॑ स्वाहा॑ शी॒र्ष्णे स्वाहा॑ भ्रू॒भ्या स्वाहा॑ ल॒लाटाय॑ स्वाहा॑

मू॒र्ध्ने स्वाहा॑ म॒स्तिष्काय॑ स्वाहा॑ के॒शेभ्यः॑ स्वाहा॑ व॒हाय॑ स्वाहा॑

ग्री॒वाभ्यः॑ स्वाहा॑ स्क॒न्धेभ्यः॑ स्वाहा॑ की॒कसा॑भ्यः स्वाहा॑ पृ॒ष्ठीभ्यः॑

स्वाहा॑ पा॒जस्याय॑ स्वाहा॑ पा॒र्श्वाभ्या॑ स्वाहा॑ – [] 37

TS 7.3.16.1 - Padam

द॒द्भ्य॑ इति॑ दत् - भ्यः । स्वाहा॑ । ह॒नू॒भ्यामि॒ति॑ ह॒नु - भ्या॒म् ।
स्वाहा॑ । ओ॒ष्ठाभ्या॑म् । स्वाहा॑ । मु॒खाय॑ । स्वाहा॑ । ना॒सिका॑भ्याम् ।
स्वाहा॑ । अ॒क्षी॒भ्याम् । स्वाहा॑ । क॒र्णा॒भ्याम् । स्वाहा॑ । पा॒रे ।
इ॒क्षवः॑ । अ॒वा॒र्ये॒भ्यः॑ । प॒क्ष्म॑भ्य इति॑ प॒क्ष्म - भ्यः॑ । स्वाहा॑ ।
अ॒वा॒रे । इ॒क्षवः॑ । पा॒र्ये॒भ्यः॑ । प॒क्ष्म॑भ्य इति॑ प॒क्ष्म - भ्यः॑ । स्वाहा॑ ।
शी॒र्ष्णे॑ । स्वाहा॑ । भ्रू॒भ्याम् । स्वाहा॑ । ल॒ला॒टाय॑ । स्वाहा॑ । मू॒र्ध॒र्णे॑ ।
स्वाहा॑ । म॒स्ति॒ष्काय॑ । स्वाहा॑ । के॒शे॒भ्यः॑ । स्वाहा॑ । व॒हाय॑ । स्वाहा॑ ।
ग्री॒वाभ्यः॑ । स्वाहा॑ । स्क॒न्धे॒भ्यः॑ । स्वाहा॑ । की॒क॒साभ्यः॑ । स्वाहा॑ ।
पृ॒ष्ठीभ्य॑ इति॑ पृ॒ष्टि - भ्यः॑ । स्वाहा॑ । पा॒ज॒स्याय॑ । स्वाहा॑ ।
पा॒र्श्वा॒भ्याम् । स्वाहा॑ । 37 (50)

TS 7.3.16.2

ऽ॒सा॒भ्या॑ स्वाहा॑ दो॒ष॒भ्या॑ स्वाहा॑ बा॒हु॒भ्या॑ स्वाहा॑
जङ्घा॑भ्या॑ स्वाहा॑ श्रो॒णी॒भ्या॑ स्वाहा॑ रो॒रु॒भ्या॑ स्वाहा॑ ऽ॒षी॒वद्भ्या॑
स्वाहा॑ जङ्घा॑भ्या॑ स्वाहा॑ भ॒स॒दे॒ स्वाहा॑ शि॒ख॒ण्डे॒भ्यः॑ स्वाहा॑

वा॒ल॒धा॒नाय॑ स्वा॒हा ऽऽण॒डाभ्या॑ स्वा॒हा शे॒पाय॑ स्वा॒हा रे॒त॒से स्वा॒हा ॥
प्र॒जाभ्यः॑ स्वा॒हा प्र॒जन॑नाय॒ स्वाहा प॒द्भ्यः॑ स्वा॒हा शे॒फेभ्यः॑ स्वा॒हा ॥
लो॒मभ्यः॑ स्वा॒हा त्व॒चे स्वा॒हा लो॒हि॒ताय॑ स्वा॒हा मा॒ञ्साय॑ स्वा॒हा ॥
स्ना॒वभ्यः॑ स्वा॒हा ऽस्थ॑भ्यः स्वा॒हा म॒ज्जभ्यः॑ स्वा॒हा () ऽङ्गेभ्यः॑ ॥
स्वा॒हा ऽऽत्म॑ने स्वा॒हा सर्व॑स्मै स्वा॒हा ॥ 38

TS 7.3.16.2 - Padam

अ॒ञ्साभ्या॑म् । स्वा॒हा । दो॒षभ्या॑मि॒ति दो॒ष – भ्या॑म् । स्वा॒हा । ॥
बा॒हुभ्या॑मि॒ति बा॒हु – भ्या॑म् । स्वा॒हा । जङ्घा॑भ्या॒म् । स्वा॒हा । ॥
श्रो॒णीभ्या॑मि॒ति श्रा॒णि – भ्या॑म् । स्वा॒हा । ऊ॒रुभ्या॑मित्यू॒रु – भ्या॑म् । ॥
स्वा॒हा । अ॒ष्टी॒वद्भ्या॑मित्य॒ष्टी॒वत् – भ्या॑म् । स्वा॒हा । जङ्घा॑भ्या॒म् । ॥
स्वा॒हा । भ॒स॒दे । स्वा॒हा । शि॒खण्डे॑भ्यः । स्वा॒हा । वा॒ल॒धा॒नाये॑ति ॥
वा॒ल – धा॒नाय॑ । स्वा॒हा । आ॒ण्डाभ्या॑म् । स्वा॒हा । शे॒पाय॑ । स्वा॒हा । ॥
रे॒त॒से । स्वा॒हा । प्र॒जाभ्य॑ इति प्र – जा॒भ्यः । स्वा॒हा । प्र॒जन॑नाये॒ति ॥
प्र – जन॑नाय । स्वा॒हा । प॒द्भ्य इति॑ पत् – भ्यः । स्वा॒हा । ॥
शे॒फेभ्यः॑ । स्वा॒हा । लो॒मभ्य॑ इति लो॒म – भ्यः । स्वा॒हा । त्व॒चे । ॥

स्वाहा॑ । लोहि॑ताय । स्वाहा॑ । मा॒ञ्साय॑ । स्वाहा॑ । स्नाव॑भ्य इति
स्नाव॑ – भ्यः । स्वाहा॑ । अ॒स्थभ्य॑ इत्य॒स्थ – भ्यः । स्वाहा॑ ।
म॒ज्जभ्य॑ इति म॒ज्ज – भ्यः । स्वाहा॑ () । अ॒ङ्गेभ्यः॑ । स्वाहा॑ ।
आ॒त्मने॑ । स्वाहा॑ । सर्व॑स्मै । स्वाहा॑ ॥ 38 (56)

(पा॒र्श्वाभ्या॑ स्वाहा॑ – म॒ज्जभ्यः॑ स्वाहा॑ – षट् च॑) (A16)

TS 7.3.17.1

अ॒ज्ज्ये॒ताय॑ स्वाहा॑ ऽज्जि॑स॒क्थाय॑ स्वाहा॑ शि॒तिप॒दे स्वाहा॑
शि॒तिक॒कुदे॑ स्वाहा॑ शि॒तिर॒न्ध्राय॑ स्वाहा॑ शि॒तिपृ॒ष्ठाय॑ स्वाहा॑
शि॒त्य॒ञ्साय॑ स्वाहा॑ पु॒ष्पकर्ण॑ाय स्वाहा॑ शि॒त्योष्ठा॑य स्वाहा॑ शि॒तिभ्र॑वे
स्वाहा॑ शि॒तिभ॑सदे स्वाहा॑ श्वे॒तानू॑काशाय स्वाहा॑ ऽज्ज्ये॒ स्वाहा॑
ल॒लामा॑य स्वाहा॑ ऽसि॒तज्ञ॑वे स्वाहा॑ कृ॒ष्णैता॑य स्वाहा॑ रोहि॒तैता॑य
स्वाहा॑ ऽरु॒णैता॑य स्वाहे॒दृशाय॑ स्वाहा॑ की॒दृशाय॑ स्वाहा॑
ता॒दृशाय॑ स्वाहा॑ स॒दृशाय॑ स्वाहा॑ वि॒सदृ॑शाय स्वाहा॑
सु॒सदृ॑शाय स्वाहा॑ रू॒पाय॑ स्वाहा॑ () सर्व॑स्मै स्वाहा॑ ॥ 39

TS 7.3.17.1 - Padam

अ॒ञ्ज्ये॒ताये॑त्य॒ञ्जि – ए॒ताय॑ । स्वाहा॑ ॥

अ॒ञ्जि॒स॒क्था॑येत्य॒ञ्जि – स॒क्थाय॑ । स्वाहा॑ ॥

शि॒ति॒प॒द इति॑ शि॒ति – प॒दे । स्वाहा॑ ॥

शि॒ति॒क॒कु॒द इति॑ शि॒ति – क॒कु॒दे । स्वाहा॑ ॥ शि॒ति॒र॒न्ध्रा॑येति॑

शि॒ति – र॒न्ध्राय॑ । स्वाहा॑ ॥ शि॒ति॒पृ॒ष्ठा॑येति॑ शि॒ति – पृ॒ष्ठा॑य । स्वाहा॑ ॥

शि॒त्य॒ञ्सा॑येति॑ शि॒ति – अ॒ञ्साय॑ । स्वाहा॑ ॥ पु॒ष्प॒कर्णा॑येति॑

पु॒ष्प – क॒र्णा॑य । स्वाहा॑ ॥ शि॒त्यो॒ष्ठा॑येति॑ शि॒ति – ओ॒ष्ठा॑य ।

स्वाहा॑ ॥ शि॒ति॒भ्र॒व इति॑ शि॒ति – भ्र॒वे । स्वाहा॑ ॥ शि॒ति॒भ॒स॒द इति॑

शि॒ति – भ॒स॒दे । स्वाहा॑ ॥ श्वे॒ता॒नू॒का॒शा॑येति॑ श्वे॒त – अ॒नू॒का॒शा॑य ।

स्वाहा॑ ॥ अ॒ञ्ज्ये॑ । स्वाहा॑ ॥ ल॒ला॒मा॑य । स्वाहा॑ ॥ अ॒सि॒त॒ज्ञ॒व

इ॒त्य॒सि॒त – ज्ञ॒वे । स्वाहा॑ ॥ कृ॒ष्णै॒ता॑येति॑ कृ॒ष्ण – ए॒ताय॑ । स्वाहा॑ ॥

रो॒हि॒तै॒ता॑येति॑ रो॒हि॒त – ए॒ताय॑ । स्वाहा॑ ॥ अ॒रु॒णै॒ता॑येत्य॒रु॒ण – ए॒ताय॑ ।

स्वाहा॑ ॥ ई॒दृ॒शा॑य । स्वाहा॑ ॥ की॒दृ॒शा॑य । स्वाहा॑ ॥ ता॒दृ॒शा॑य ।

स्वाहा॑ ॥ स॒दृ॒शा॑य । स्वाहा॑ ॥ वि॒स॒दृ॒शा॑येति॑ वि॒स॒दृ॒शा॑य । स्वाहा॑ ॥

सु॒सदृ॑शा॒येति॒ सु – स॒दृ॒शाय॒ । स्वा॒हा ॥ रू॒पाय॒ । स्वा॒हा () ।
सर्व॑स्मै । स्वा॒हा ॥ 39 (52) (रू॒पाय॒ स्वा॒हा – द्वे च॑) (A17)

TS 7.3.18.1

कृ॒ष्णाय॒ स्वा॒हा ॥ श्वे॒ताय॒ स्वा॒हा ॥ पि॒शङ्गा॒य स्वा॒हा ॥ सा॒रङ्गा॒य स्वा॒हा ॥
ऽरु॒णाय॒ स्वा॒हा ॥ गौ॒राय॒ स्वा॒हा ॥ ब॒भ्रवे॒ स्वा॒हा ॥ नकु॑लाय॒ स्वा॒हा ॥ रोहि॑ताय॒
स्वा॒हा ॥ शो॒णाय॒ स्वा॒हा ॥ श्या॒वाय॒ स्वा॒हा ॥ श्या॒माय॒ स्वा॒हा ॥ पा॒कला॒य
स्वा॒हा ॥ सु॒रूपा॒य स्वा॒हा ॥ अ॒नुरू॒पाय॒ स्वा॒हा ॥ वि॒रूपा॒य स्वा॒हा ॥ स॒रूपा॒य
स्वा॒हा ॥ प्र॒तिरू॒पाय॒ स्वा॒हा ॥ श॒बला॒य स्वा॒हा ॥ क॒मला॒य स्वा॒हा ॥ पृ॒श्नये॒
स्वा॒हा ॥ पृ॒श्नि॒सक्था॒य स्वा॒हा ॥ सर्व॑स्मै स्वा॒हा ॥ 40

TS 7.3.18.1 - Padam

कृ॒ष्णाय॒ । स्वा॒हा ॥ श्वे॒ताय॒ । स्वा॒हा ॥ पि॒शङ्गा॒य । स्वा॒हा ॥ सा॒रङ्गा॒य ।
स्वा॒हा ॥ अ॒रुणाय॒ । स्वा॒हा ॥ गौ॒राय॒ । स्वा॒हा ॥ ब॒भ्रवे॒ । स्वा॒हा ॥
नकु॑लाय॒ । स्वा॒हा ॥ रोहि॑ताय॒ । स्वा॒हा ॥ शो॒णाय॒ । स्वा॒हा ॥
श्या॒वाय॒ । स्वा॒हा ॥ श्या॒माय॒ । स्वा॒हा ॥ पा॒कला॒य । स्वा॒हा ॥
सु॒रूपा॒येति॒ सु – रू॒पाय॒ । स्वा॒हा ॥ अ॒नुरू॒पायेत्यनु॑ – रू॒पाय॒ ।

पद पाठे (वाक्य सहित) – सप्तमकाण्डे – तृतीयः प्रश्नः

स्वाहा॑ । वि॒रूपा॑येति वि-रूपाय॑ । स्वाहा॑ । स॒रूपा॑येति स-रूपाय॑ ।
स्वाहा॑ । प्र॒तिरूपा॑येति प्र॒ति - रूपाय॑ । स्वाहा॑ । श॒बला॑य । स्वाहा॑ ।
क॒मला॑य । स्वाहा॑ । पृ॒श्नये॑ । स्वाहा॑ । पृ॒श्नि॒सक्था॑येति
पृ॒श्नि - स॒क्थाय॑ । स्वाहा॑ । सर्व॑स्मै । स्वाहा॑ ॥ 40 (46)

(कृ॒ष्णाय॑ - षट्च॑त्वारि॒ंशत्) (A18)

TS 7.3.19.1

ओष॑धीभ्यः स्वाहा॑ मू॒लेभ्यः॑ स्वाहा॑ तू॒लेभ्यः॑ स्वाहा॑ काण्डे॑भ्यः
स्वाहा॑ वल्.शै॑भ्यः स्वाहा॑ पु॒ष्पेभ्यः॑ स्वाहा॑ फ॒लेभ्यः॑ स्वाहा॑
गृ॒हीते॑भ्यः स्वाहा॑ अ॒गृही॑तेभ्यः स्वाहा॑ अ॒वप॑न्नेभ्यः स्वाहा॑ श॒याने॑भ्यः
स्वाहा॑ सर्व॑स्मै स्वाहा॑ ॥ 41

TS 7.3.19.1 - Padam

ओष॑धीभ्य इत्योष॑धि-भ्यः । स्वाहा॑ । मू॒लेभ्यः॑ । स्वाहा॑ । तू॒लेभ्यः॑ ।
स्वाहा॑ । काण्डे॑भ्यः । स्वाहा॑ । वल्.शै॑भ्यः । स्वाहा॑ । पु॒ष्पेभ्यः॑ ।
स्वाहा॑ । फ॒लेभ्यः॑ । स्वाहा॑ । गृ॒हीते॑भ्यः । स्वाहा॑ । अ॒गृही॑तेभ्यः ।

स्वाहा॑ । अव॑पन्नेभ्य॒ इत्य॑व – प॒न्नेभ्यः॑ । स्वाहा॑ । श्या॑नेभ्यः ।

स्वाहा॑ । सर्व॑स्मै । स्वाहा॑ ॥ 41 (24)

(ओष॑धीभ्य – श्रु॑तुर्वि॒ञ्शतिः॑) (A19)

TS 7.3.20.1

वन॑स्पतिभ्यः॒ स्वाहा॑ मू॒लेभ्यः॑ स्वाहा॑ तू॒लेभ्यः॑ स्वाहा॑ स्क॒न्धोभ्यः॑
स्वाहा॑ शा॒खाभ्यः॑ स्वाहा॑ पर्णे॑भ्यः स्वाहा॑ पु॒ष्पेभ्यः॑ स्वाहा॑ फ॒लेभ्यः॑
स्वाहा॑ गृ॒हीतेभ्यः॑ स्वाहा॑ ऽगृ॒हीतेभ्यः॑ स्वाहा॑ ऽव॑पन्नेभ्यः स्वाहा॑
श्या॑नेभ्यः स्वाहा॑ शि॒ष्टाय॑ स्वाहा॑ ऽति॑शिष्टाय स्वाहा॑ परि॑शिष्टाय
स्वाहा॑ स॒ञ्शिष्टाय॑ स्वाहो॑ – छि॒ष्टाय॑ स्वाहा॑ रि॒क्ताय॑ स्वाहा॑ ऽरि॒क्ताय॑
स्वाहा॑ प्र॑रिक्ताय स्वाहा॑ स॒ञ्रिक्ताय॑ स्वाहो॑ – द्रि॒क्ताय॑ स्वाहा॑ सर्व॑स्मै
स्वाहा॑ ॥ 42

TS 7.3.20.1 - Padam

वन॑स्पतिभ्य॒ इति॑ वन॑स्पति – भ्यः॑ । स्वाहा॑ । मू॒लेभ्यः॑ । स्वाहा॑ ।
तू॒लेभ्यः॑ । स्वाहा॑ । स्क॒न्धोभ्य॒ इति॑ स्क॒न्धः – भ्यः॑ । स्वाहा॑ ।
शा॒खाभ्यः॑ । स्वाहा॑ । पर्णे॑भ्यः । स्वाहा॑ । पु॒ष्पेभ्यः॑ । स्वाहा॑ ।

पद पाठे (वाक्य सहित) – सप्तमकाण्डे – तृतीयः प्रश्नः

फले॑भ्यः । स्वाहा॑ । गृही॑तेभ्यः । स्वाहा॑ । अगृही॑तेभ्यः । स्वाहा॑ ।
अवप॑न्नेभ्य इत्यव॑ – पन्ने॑भ्यः । स्वाहा॑ । शयाने॑भ्यः । स्वाहा॑ ।
शिष्टाय॑ । स्वाहा॑ । अतिशिष्टा॑येत्यति॑ – शिष्टाय॑ । स्वाहा॑ ।
परि॑शिष्टायेति॑ परि॑-शिष्टाय॑ । स्वाहा॑ । सञ्शिष्टा॑येति सं – शिष्टाय॑ ।
स्वाहा॑ । उच्छिष्टा॑येत्युत् – शिष्टाय॑ । स्वाहा॑ । रिक्ताय॑ । स्वाहा॑ ।
अरिक्ताय॑ । स्वाहा॑ । प्ररिक्ता॑येति प्र – रिक्ताय॑ । स्वाहा॑ ।
सञ्रिक्ता॑येति सं – रिक्ताय॑ । स्वाहा॑ । उद्रिक्ता॑येत्युत् – रिक्ताय॑ ।
स्वाहा॑ । सर्व॑स्मै । स्वाहा॑ ॥ 42 (46)

(वनस्पति॑भ्यः – षट् चत्वारि॑ञ्शत्) (A20)

पद पाठे (वाक्य सहित) – सप्तमकाण्डे – तृतीयः प्रश्नः

Prasna Korvai with starting Padams of 1 to 20 Anuvaakams :-

(प्र॒ज॒वं – ब्र॒ह्म॒वा॒दि॒नः॒ कि – मे॒ष वा आ॒प्त – आ॒दि॒त्या उ॒भ॒योः॑ –
प्र॒जा॒प॒ति॒र॒न्वा॒य – नि॒न्द्रो॒ वै स॒दृङ् – डि॒न्द्रो॒ वै शि॒थि॒लः –
प्र॒जा॒प॒ति॒र॒का॒म॒य॒ता ऽन्ना॒दः॒ – सा वि॒रा॒ड् – सा॒वा॒दि॒त्यो॑ – ऽर्वा॒ङ् –
भू॒त – मा मे – ऽग्नि॒ना – स्वा॒हा॒ऽऽधि॒न् – द॒द्भ्यो॑ऽ – ज्ये॒ताय॑ –
कृ॒ष्णा – यौष॑धी॒भ्यो – व॒न॒स्प॒ति॒भ्यो – वि॒श॒तिः॑)

Korvai with starting Padams of 1, 11, 21 Series of Panchaatis :-

(प्र॒ज॒वं – प्र॒जा॒प॒ति – र्य॑दछ॒न्दो॒मं – ते हु॒वे स॒वा॒ऽह – मोष॑धी॒भ्यो
– द्वि॑च॒त्वा॒रि॒श॒त्)

First and Last Padam of Third Prasnam of 7th Kandam

(प्र॒ज॒व॒ञ् – सर्व॑स्मै॒ स्वा॒हा॑)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां पद पाठे सप्तमकाण्डे तृतीयः

प्रश्नः समाप्तः ॥

पद पाठे (वाक्य सहित) – सप्तमकाण्डे – तृतीयः प्रश्नः

Details of Panchati and Padam for Kandam 7, Prasanam 3 (TS 7.3)

| | Panchati | Padams |
|-------------|----------|--------|
| Anuvakam 1 | 4 | 201 |
| Anuvakam 2 | 2 | 91 |
| Anuvakam 3 | 2 | 93 |
| Anuvakam 4 | 2 | 84 |
| Anuvakam 5 | 3 | 181 |
| Anuvakam 6 | 2 | 101 |
| Anuvakam 7 | 4 | 202 |
| Anuvakam 8 | 2 | 87 |
| Anuvakam 9 | 3 | 173 |
| Anuvakam 10 | 5 | 271 |
| Anuvakam 11 | 3 | 132 |
| Anuvakam 12 | 1 | 54 |
| Anuvakam 13 | 1 | 68 |
| Anuvakam 14 | 1 | 51 |
| Anuvakam 15 | 1 | 60 |
| Anuvakam 16 | 2 | 106 |
| Anuvakam 17 | 1 | 52 |
| Anuvakam 18 | 1 | 46 |

पद पाठे (वाक्य सहित) – सप्तमकाण्डे – तृतीयः प्रश्नः

| | | |
|-------------|----|------|
| Anuvakam 19 | 1 | 24 |
| Anuvakam 20 | 1 | 46 |
| Total → | 42 | 2123 |

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in